

四庫全書

子部

欽定四庫全書

珊瑚網卷三十四

明 汪砢玉 撰

名畫題跋十

雲林春霽圖

余與宗晉道兄別十有六年矣忽邂逅吳下杯酒陳情
不能相舍老杜所謂夜闌更秉燭相對如夢寐者諷詠
斯語相對愴然人生良會不易而況艱虞契濶若此者

乎以十餘載而僅一面則人生果能幾會耶悲慨亦未
有若此言也明日道兄將歸錢唐余亦鼓柁烟波之外
因寫圖賦詩以寓別後戀戀不盡之情云至正十四年
二月十二日倪瓚葑門客樓書是日昔剌正卿陸季和
顧思恭同集 開元道士來相訪索寫雲林春霽圖別
我雲林已二載去濯滄浪泛五湖滿目波容蘸山黛撩
人柳眼亂花鬚避喧政欲尋耕釣源上桃花無處無
五株烟樹空陂上便是雲林春霽圖仙老御風歸洞

府隱君鼓枻入江湖幾回夢見青雙服十載相逢白
盡鬚此日武陵溪上路桃花流出世間無僕與雲
林別已及二年雲林棄田宅攜妻子繫舟汾湖之濱
日與遊者皆烟波釣艇江湖不羈之士也回視鄉里
昔之紛擾如脫弊屣真有見之士也至正十六年孟
秋僕侍家叔玄度于開元而宗晉宗兄持此見示風
塵眯目展卷浩然因為和詩其上吳興王蒙題

雲林溪山春靄圖

至正九年四月廿八日句吳倪瓚贈王元賓之廣陵
十年不見老雲林片雲東來聞足音畫圖何處看秋色
瑤江草堂深復深鐵笛道人在滄洲軒試老溫舊韻

松江山色圖

癸丑閏三月六日寫松江山色并詩贈子俊茂才用答
佳餉幻霞子延陵倪瓚窮冬舟過吳淞渚千里夷猶
少稽古范張肆小如壺中雞黍時時慰羈旅阿兄彈琴
送飛鴻讀書頗有沉潛功阿弟煮茶敲石火滿江春雨

聽松風圖盡四壁醒愁睡隱几嗒然忘世慮扁舟一葉
五湖遊身與閒雲無來去三月六日天氣清為爾咏出
詩無聲袖有青銅錢二百為余沽酒作魚羹 牛鳴野
帘中雞登山水上黃鐘雜姑洗春容以清亮別鵲暮鳴
飛流水春演漾愛爾絃手忘令我形神暢憶昔擅能事
宋袁余所尚錢君生獨後超軼絕塵鞅操琴晚聞道月
斧揮天匠杳如清廟瑟朱絃聽一倡古道久寂寥古音
亦淪喪促軫淚沾纓歌詩重悲悵

溪山仙館圖

辛亥二月廿九日留華亭南里潘君以仁宅因懷其年
此日與心遠同在餘不溪開玄仙館乃作詩曰 蕭蕭
風竹和幽吟二月江村春雨深東主山中此時節隔溪
梅李正陰陰 瓚

惠山圖

至正五年三月八日玄素先生來林下瓚乃賦詩曰吳
淞江水春映空浪波云云霞影紅耕田鑿井居其左今

我長懷甫里翁夢見維舟江畔柳剝啄敲門散杯酒整
冠起接平生歡石逕蘭芳重攜手 雨後共行林下正
見惠山先生命璣寫之畫訖因書此詩于上張外史陳
先生見之必大笑也倪璣記

佳樹陰森欲礙空畫成夜落燈花紅絕憐帶經自鋤者
未忍竟別天隨翁汾湖春雲散高柳湖水微茫綠于酒
翁歸天末見青山臨風莫負揮絃手 陳芳

用元
鎮韻

惠山圖名下有白文倪璣之印畫邊有朱文雲林印

字作麻姑仙壇體為雲林畫之最佳者若玄素先生
姓陸居淞吳江之上千頃生識

惠麓圖

好畫能官黑仲明長松澗下濯冠纓當年小筆今重展
回首蘭陵夢亦驚仲明高昌名族也嘗為宜興嘉定二
州同知甚有惠政余至蘭陵郡每館于其家偶寫此圖
贈仲明而陸信甫適至復取以遺信甫雖片紙亦可觀
也至正廿三年八月二日偶適志學鄉友書齋中忽以

見示轉瞬十有二年矣世殊事異為之慨然志學時寓
笠澤施氏館中璣記

元鎮寫贈仲明辛卯十一月二十日

廿二日復從仲明許假此以贈陸信甫雲林生記

八月梁溪新畫霽溪南溪北水交流徵君滌硯臨池後
貌得灣碕幾樹秋 王蒙

秋聲吹碎江南樹政是瀟湘腸斷處一片古今愁荒碕
水亂流 披圖驚歲月舊夢何堪說追憶謾多情人間

無此清 右調菩薩蠻筠菴王國器

天末遠峰生掩冉石間流磴落寒清因君寫出三株樹
忽起孤雲野鶴情 虞堪

葛翁井上久不住一日披圖生遠思記得山中有書報
白雲長繞歲寒枝 殷弼

雲林畫法學王維氣韻風流或過之猶記昔年清閨閣
春風吹滿鳳皇枝 西郊唐元

曉色淒淒涼雨過也應草木漸飄零水邊石畔無人到

惟有長松滿意清
張緯

石磴清泉急晴山綠樹多雲林惠山下風景近如何

袁養福

倪迂南渚圖

南渚無來轍窮冬更聞寥水寬山隱隱野曠月迢迢

想像寫南渚冬盡詩意圖至正廿四年十月六日倪瓚
記

窈窕茅堂石徑幽小山叢桂足淹留仙人已跨遼天鶴

寫得雲林一段秋

錢仲益

昔年看來墨池鷺風雨扁舟載酒過一自春歸清閨閣
幾番蛛網落花多
嘉禾朱逢吉

蕭散雲林子詩工畫入清吟情何浩蕩筆勢更縱橫鄉
里推高誼江湖足今名近傳乘鶴去應想在蓬瀛
華亭顧祿

倪元鎮夕陽山色

夕陽渡口見青山誰識其中有此閒君本為樵北山北

賣薪持斧到人間 壬子八月十四日為彥昇寫并題

一絕雲林生

不見倪迂今百年故山喬木嶺蒼烟晴窗展軸觀圖畫

澹墨依然見古賢

唐寅

一題江亭秋色

又遠山湧翠

山遠初晴湧翠林深末葉藏鶯日與漁樵為侶蕭然自適餘生 癸丑正月二十日雲林生寫

羣山重疊勢嵯峨蓼岸蘋洲水不波落葉蕭疎風淅淅

淵明歸去盼庭柯
儲思誠題

晴川漾漾樹疎疎
西郭門頭宿雨餘
如此谿山着茅屋

潘郎何必詫閒居
馬怡

偶因滌硯寫從容
點染那能似畫工
千載風流誰可擬

令人猛憶米南宮

甬東顧盟

元鎮所居地名蝸牛廬俗呼黃犢廬

又江渚風林

江渚暮潮初落風林霜葉渾
稀倚杖柴門間寂懷人山
色依微一望洞庭秋水相逢
南浦孤篷江干有興騷客

閒居久約漁翁 至正癸卯九月望日畫贈伯徵君并
題倪瓚

倪迂谿陰山色圖

地僻林深無過客 松門元自不曾關
展將一幅溪藤滑 寫得谿陰數點山
滄浪漫士倪瓚

居卜清幽地圖開 平遠山秋雲供眼界
翠竹入簷間 列嶂延西爽層巒簇晚鬟
送青來綺閣擁綠鎖松關 摩詰難加點
關全未及扳 汨塵何日了嘯咏得清閒
馬治

題

風月吟哦裏乾坤指顧中萬山排濶野一雨洗長空

回齋

松坡平遠圖

門前漠漠風吹沙閉門倦客獨思家樓頭吹角夢初醒
猶聞深院響琵琶白雲蕭條楓葉丹愁人行吟復坐歎
歸心夜起東流水夢入松溪第九灘少年持家學詩禮
馮老御史之孫子觴半投筆調白羽拔劍醉舞為君起

至正十年九月因過郡中留學之掾郎宅五日其子
思誠溫粹勤儉而好學已能持家具甘旨之奉今年
才十有七歲矣僕既寫此為贈并賦三絕句其上東
海倪瓚

九灘在荆谿倪迂遊蹤多在焉此圖當是其中年作
以書法最工晚年字不稱畫矣 董其昌觀

倪元鎮着色山水

着色雲林畫世所絕少惟新安
汪景辰有此歟後為人持去

至正三年癸未歲八月望日高進道過余林下為言僦

居蘇州城東有水竹之勝因想像圖此并賦詩其上云
儼得城中二畝居水光竹色照琴書晨起開軒驚宿鳥
詩成洗硯沒游魚

好在雲林一老迂畫圖寄到玉山居向來王謝原同調
宜向城東共讀書 龍門良琦

又溪山亭子

東海倪迂畫溪山亭子贈孟佶文學歲乙未閏正月八
日

戲墨重看十七年闔閭城外蕩飛烟間村蘭若風波外
坐對湖山一惘然 辛亥十一月九日復覽重題雲林
子

故人一別動經年雲樹雲山隔遠烟來看畫圖如夢裏
焚香清對意悠然 與雲林高士在儒林酌別今隔歲
矣謹用韻寫上海雲方丈一教之王植

又溪亭山色

欽下丁未五月
東海倪璣畫

石滑巖前雨泉香樹杪風江山無限景都聚一亭中

張宣為士雍題

聽松菴裏試茶還第二泉頭更看山猶有去年詩興在
雲林清閬墨班班 成化庚子三月廿六日吳寬題于

京師官舍

倪迂仙去幾時還留得溪亭對晚山老我今為亭上客
啜茶閒試鷓鴣斑 卞榮次韻

朝看雲往暮雲還大抵幽人好住山倪老風流無處問
野亭留得蘚苔斑 華亭奚昊

倪迂林亭山色

來訪幽居秋滿林
塵喧暫隔散煩襟
風迴硯沼搖山影
夜聽寒蛩和客吟
危磴白雲侵野屐
高桐清露濕瑤琴
蕭然不作人間夢
老鶴眠松萬里心
壬子秋日戲寫
林亭山色復係之
詩贈潘翁仲暉少
致濶云耳海岳居
士倪瓚

亭子清溪上疎林落照中
懷人隔秋水無復問幽蹤
又松亭秋色

阿翁好讀閒居賦桃李春風滿庭戶時與華陽道士行
還隣甫里先生住寶淨僧居共齋粥已看富貴如風露
我來三宿夜連牀行路荆榛歲將暮 壬子九月十九

日為潘翁仲暉寫松亭山色圖并賦七言題右方瓚

華屋不能留此圖秀色今來照書戶夸父空將碧嶂移
羽人仍在丹丘住非人玩物物玩人老墨重披眼迷霧
門前桃李換春風只有青松自遲暮 此圖實吾蘇貴

遊家物嘗目擊其人之愛護比珠玉人往物移今為淮

揚趙文美所得文美號賞識其致重將逾于前而保于
久也雲林先生戲墨在江東人家以有無為清俗先生
此筆疎秀逾常然非丹青炫曜人人得而好之于此而
好者非古雅士不可先生之道殆見溢于南而流于北
矣文美持來求跋因次先生韻為詩庸寓得失之嘆云
長洲沈周

倪迂林亭遠岫

壬子九月望日過孤山大士寶淨精舍留宿十九日為

寫林亭遠岫并賦無住菴主懶瓚 敬亭山色青如染
古德幽居在西崦片雲出岫本無心拂石紫林晴冉冉
江南帆影又江南笑看羣狙芋四三道遇化城聊暫止
更營寶刹小禪龕

又林亭晚岫

小單條更有霜
林遠岫失錄

十月江南未隕霜青楓欲赤碧梧黃停橈坐對西山晚
新為題詩小著行 幻霞子

山中茅屋是誰家兀坐閒吟到日斜坐客不來山鳥散

呼童汲水煮新茶 趙覲

倪元鎮疎林亭子

谿聲瀾瀾流寒玉山色依依到翠屏地僻人閒車馬寂
疎林落日草玄亭 至正庚子八月十又二日倪瓚畫
并題

春水瀾漫好放船疎林亭子尚巋然赤闌干外山無數
指顧蒼烟白鳥還 徐霖

又清溪亭子

數里清溪帶遠隄夕陽芳草亂鶯啼欲將亭子教搥碎
多少離愁到此迷 辛亥四月東海雲林生寫并絕句
題贈叔經茂異時孝廉陳君同集

溪上閒亭萊草邊越山吳樹總悠然何須把袂勞相別
身世江湖萬里船 景星

澄江浸白石翠竹俯閒亭羣樹鬱蒼蒼我心同泛萍
淡菴

寂寂隄上亭藹藹堦前草逸思樂此中塵心自然埽

廬陵楊士奇

又紫芝山亭

山房臨碧海熒熒紫芝榮雲上飛鳬鵝月中聞鳳笙
木烟生石竈竹雪洒前楹誰見陳高士希夷善養生
八月廿日為叔平畫紫芝山亭圖并賦璣

倪雲林西園圖

此幅舊藏王處今
歸燕都萬駙馬矣

西園山翠近相望疏渠種柳作林塘幽吟一月不出戶
落地巖花春雨香題詩作賦慚草草便欲相從似幽

討石上靈芝三秀英臨水登山不知老 至正乙巳四月十七日作西園圖并賦此詩聊為醉樵大參清賞云

延陵倪瓚

一作句吳

玉遮親家所藏倪元鎮真蹟最多俱得之梁溪談公予此西園圖亦談君所遺用筆道勁直是荆關再生目中所罕見者也庚午春暮衙齋寂寥玉遮過茗上訪余出此見示為之欣賞焚香相對令人俗想都忘真異品也 茂苑文嘉題于烏程縣學之碧梧精舍

山郭幽居圖

一名荆蠻民

山郭幽居正向陽
喬林古木鬱蒼蒼
剡藤百幅誰能置
為埽虬枝蔽日長
荆蠻民寫

雲林雨過踏青陽
礧水濺濺老樹蒼
不是硯坳雲作陣
疎篁空自拂簷長
尚左生次韻

丘崇崇兮下有流水
樹森森兮匪櫟伊梓
彼櫟葉兮且壽梓
棄為薪兮于材何有
造物孔仁兮時誰歸咎
韋羌山人陳基

千年石上苔痕裂落日溪回樹影深我是江南樵隱者
人間何處有雲林 胡寧

十年不鼓江湖楫木葉蕭蕭鬢影秋忽憶滿川風雨夕
雲林岸口獨維舟 陸繼善

倪元鎮生平不畫人物維龍門僧一幅有之亦罕用
圖書惟荆蠻民一印者其畫遂名荆蠻民

杜綰號雲林黃長睿亦號雲林子元鎮又嘗號倪幻
霞又號滄浪漫士又號淨名菴主

南村隱居圖

陶令卜宅南村裏
快雪初晴思一遊
樹辨微茫來獨鶴
櫓搖欹倒散輕鷗
墨池繞溜春水滿
塵榻繙書夕照收
相見惘然如有失
掉頭吟咏出林丘
雪後過子貞隱居
寫此并詩以贈
甲辰正月十二日
雲林瓚

高人卜築避塵埃
山似蓮花水面開
半晝猶眠疑是夜
推窗只許月明來
新淦鄧伯言

尋山因避俗
水竹是幽居
無事還終老
閒來可著書

餘姚景星

虛堂寂寂片雲籠
山色蒼蒼一望中
檻外笙簧驚夢起
琅玕歷亂響西風
士奇

我愛溪頭山色還
憐竹裏風聲寂
靜元非人世茅茨總
是逃名
澹菴

山高白石秀竹密
綠陰濃窗映風光
埽溪流月影重

上清外史

避世尋幽處
虛堂倚石臺
響泉清磬合
飛嶠畫屏開
竹

散風前影松垂雨後苔浮沉應不問何似小蓬萊上

官伯圭

蓮涇隱居圖

採蓮涇上漣漪綠苔石幽篁依古木遇着疎人周傑翁
邀余把臂清池曲余邂逅仲傑隱居採蓮涇上戲寫
此圖并賦詩為贈雲林生倪瓚

洒掃空齋住渾忘應世情身閒成道性家散剩詩名古
器邀人玩新圖棟客呈可憐山水興投老失昇平此

余處圍城時懷雲林詩也今道路既通猶未得一聚首
為恨適允恭將此索題因書其上句曲外史張雨

雲湧岡巒起伏烟籠草樹淒迷空見蘭亭筆法不逢夔

府詩題 徐賁

三年不見雲林面應向烟波狎釣徒忽到劉郎舊遊處
桃花無地覓玄都 癸丑重九日復觀此圖有感而作
持以索題者允恭也曲江錢惟善識

憶適梁溪宅于今四十年賦詩清閨閣試茗惠山泉夜

雨牽幽蔓春雲黯遠天鄉情與離思看畫共淒然
呂志學

羣樹葉初下千山雲半收空林門不掩經得幾多秋
澹菴書

倪迂林堂詩思圖

林堂竹樹藹交陰求友嚶鳴亦好音絃誦諸生時列坐
邑中宓子但鳴琴
七月廿三日寫林堂詩思圖并詩
以遺又新茂才璿

桐里湖堂圖

一名高
尚書圖

七月一日風雨集桐里湖邊吹夕涼柳葉鎖烟籠翡翠
荷花濺淚濕鴛鴦却疑身在瀟湘渚且看舟停雲錦鄉
顧我自非徐孺子陳蕃下榻更街腸 留昌言高尚書
堂戲寫此圖并賦贈馬瓚

七月
一日

雅宜山齋圖

靈巖對植雅宜山穹林巨石臨蒼灣若翁遁跡在其麓
有子讀書長閉關松根茯苓煮可握簷下慈烏去復還

寫圖愛此錦步障白雲紅杏春欄班 至正乙巳五月
廿三日勾吳鄉璚畫雅宜山齋賦詩以紀歲月云 陳
惟寅有雅宜山齋寅號大髯弟允號小髯

安處齋圖

湖上齋居處士家淡烟疎柳望中賒安時為善年年樂
處順謀身事事佳竹葉夜香缸面酒菊苗春點磨頭茶
幽栖不作紅塵客遮莫寒江捲浪花 十月望日寫安
處齋圖并賦長句倪璚

睡起山齋渴思長呼童煎茗滌枯腸軟塵落碾龍團綠
活水翻鐙蟹眼黃耳底雷鳴輕着韻鼻風過處細聞香
一甌洗得雙瞳豁飽玩茗溪雲水鄉 陳方

安素齋圖

石潤苔痕雨過竹陰樹影雲深聞道安素齋裏能容狂
客孤吟 壬子十月五日余過收軒寫贈安素居士并
詩瓚

芥舟軒圖

一名優鉢曇花

壬子正月廿三日解后芝年講主于婁江朱氏之芥舟
軒中芝年熟天台之教旨嚴菩薩之戒儀七遮既淨一
乘斯悟與語久之斂衽敬嘆因寫圖賦詩以贈 優鉢
曇花不世開道人定起北巖隈遠山迢遞窻中綠垂柳低
昂水次栽丈室淨名禪不二三生園澤夢應迴閒雲野
鶴時相遇草草新詩為爾裁 瓚

平野軒圖

國寶照磨有平野軒在揚州城郭中今寓是十許年矣

至正九年十一月在開元寺為寫此圖并詩以贈 雪筠
霜木影差差平野風烟望遠時回首十年吳苑夢揚州
依約鬢成絲

烟鶴軒圖

林宗道新聞小軒南望平蕪烟樹渺然有千里之意因
名曰烟鶴蓋取韋刺史遠鶴唳詩語為賦二詩并繪新
圖書題卷末着之軒中以發幽賞 烟鶴軒前枕石眠
一聲清唳落紅烟攬衣起望行雲意遠思憑虛急欲仙

楓落吳江烟雨空
戛然鳴鶴紫烟中
坐看雲影橫江去
明滅寒流夕照紅
東吳倪瓚言

閒雲散盡楚江遙
千古雲林竟寂寥
賴有丹書遺墨在
看山看水總魂消
張固

懶瓚竹樹小山

益公以道不見忽忽今七改年
辛亥七月余來自苕溪
偶遇松林之桐里雙井院數日矣
以道適過慧日懺堂
解后一見因寫竹樹小山并賦詩
寄意云懶瓚一笑相

逢豈有期因懷西崦話移時李公堂裏頻曾宿陸子泉
頭舊有詩旅思淒淒非中酒人情落落似殘碁雲濤眼
底三生夢鷗語秋汀又語離是日性源秋水三上人
同集廿一日

又小山竹樹

二月獨凭闌微茫烟樹間提魚來就煮問馬只看山岸
柳渾無賴孤雲相與還持盃竟須飲春物易闌珊雲
林生寫小山竹樹為蘄軒老友

倪迂園石荒筠圖

蕭條江渚上舟楫晚相過卷幔吟青嶂臨流寫白鵝壯
心千里馬歸夢五湖波園石荒筠翳風前恍浩歌 玄

度文學工詞翰藹然如虹之氣真江南澤中駒也十二
月十四日侍乃翁訪僕江渚之上相與話舊踟躕深動
故園之感因想像喬木佳石翳没于荒筠草蔓之中遂
寫此意并賦詩以贈焉已酉倪瓚記

玄度
張姓

春樹筠石圖

芝寶丹房苔石青
筠片葢酒滿罌
四月十七日寫筠石春樹并詩以贈叔平道契雲林子瓚

樹影離離岸草青
江雲漠漠遠山橫
輕舟明日松陵路
逢着仙人醉玉罌
袁華次韻

不見雲林近十年
石筠烟樹轉清妍
相思每動琴亡嘆
重為題詩一泫然
孫敏

雙樹筠石圖

飛雲樓上看飛雨鐵騎驅空十里來此日使君一杯酒
為解羈人萬古哀故園荒蕪尚松竹旅舍蕭條惟草萊
相知賴有陳博士詩卷酒瓢時往回至正十五年五
月十七日雨中排悶訪雲浦判官為設茗讌因寫雙樹
筠石并賦詩發主人翁陳博士袁隱者陳掾郎一笑倪
瓚

使君高卧北窗下徵士遠從南渚來相看此日足可樂
已經古人何必哀政爾歡虞留笠澤底須服食慕蓬萊

畫成筠石兼雙樹日暮方容倒載回
陳基和

六君子圖

廬山甫每見輒求作畫至正五年四月八日泊舟弓河
之上而山甫篝燈出此紙苦徵畫時已憊甚只得勉以
應之大癡老師見之必大笑也

遠望雲山隔秋水近看古木擁陂陀居然相對六君子
正直特立無偏頗
大癡

江頭碧樹動秋風江上青山接遠空若向波心添釣艇

還須畫我作漁翁 朽木居士

天風起雲林衆樹動秋色仙人招不來空山倚晴碧

漱江趙觀

黃公別去已多年忽見雲林畫裏傳二老風流遼鶴語

悠然展卷對江天 吳興錢雲

此畫因大癡詩有居然相對六君子句遂名其圖乃

松栢樟楠槐榆六樹行列修挺疎密掩映位置得宜

而皆在平地且氣象蕭索有賢人在下位之象豈感

當時世運否塞高流隱遁而為是歟廬山甫別號白
石先生 妙香道者識于葯房

雲松圖

華林郭裏陳高士三泖九峰時一遊欲結松亭看雲氣
更招鳴鶴友浮丘 辛亥春寫雲松圖并詩贈德嘉高
士璣

雙松圖

松生樛櫟間山出雲雨外付與野亭人翛然靜相對

璣

灤東雙樹出雲林
曾向維皮畫裏尋
風雨滿山秋夢醒
一聲鳴鶴在山陰
鐵笛道人

山雲自多態
虎魄邈難尋
千載維皮意
悠然契我心

安雅

曹霸能為松
寫真揮毫不復畫
騏驎雲晴相約空山去

千載蟠根有茯苓

曲江居士

錢氏思復印

九峰只在泖雲西
松下來尋隱者棲
隱者不歸空見畫

滿山風雨夜猿啼 廣陵居竹塹人

成氏元章印

雲林山水無縱橫習氣內景經云淡然無味天人糧
殆于此發竅此圖是已 其昌

初柳圖

以道因書余舊詩春日試筆一首今三十有餘年矣并
書畫上 喜看新酒似鵝黃已有春風拂草堂二月江
南初破柳扁舟晚下獨鳴榔苔生不礙山人屐花發應
憐野老牆世外寧辭千日醉未容人事惱年光 雲林

子瓚

倪元鎮翠竹喬柯

此幅余得之項楚
襄後營賓事售去

篝燈共聽蕭蕭雨已是催花二月過翠竹喬柯渾漫興
研山忽覺蘚文多三月二日宿無礙方丈元璞長老
命寫竹石寫已并賦以發一笑云是夕基上人誠藏主
賓講師同集倪瓚

承塵賦鵬已多年雨木霜筠共愀然昨日不堪江上過
數聲隣笛寺門前雙鶴軒人

林石蕭蕭聽雨時為摹清閨閣前枝倪迂仙去今何在
東海投竿掣巨鰩 翠屏道人

清詩蕭散疎仍密淡墨淋漓瘦更腴三絕真堪入三昧
令人相對憶倪迂 每見雲林小幅未嘗不佳此紙尤
其得意筆也非得荆關肯綮者能之乎章憲

水墨不難于蒼古而難于穉秀故春之始陽花之猶
含女之早嬌香色態趣冲然媚人請以此觀雲林筆
蓬峰鶴嶺中人汪砢玉題于漱六齋

古木幽篁圖

何遜來時梅似雪
小山竹樹寫幽情
東風吹上毘陵道
為報相思夢亦清
正月十日毘陵故人何士信先生
來求余畫因寫古木幽篁圖并賦詩以贈
甲寅倪瓚
梁溪山水清且奇
爽氣散入詩人脾
雲林平生才俊逸
江湖着處墨淋漓
興來時作希世筆
石上傑出春風枝
何其仙夢化飛鶴
使我對景成遐思
倪雲林予湖海
故人也
以詩名重于世
時寫山水作木石圖
人每得之

以為奇玩近聞雲林作古予不能忘情因題五十六字
于右乙卯春彭城錙孺

古木修篁景最多汗青曾記誓山河靈槎一去無消息
細看宣王石鼓歌道林老友吳庚一為曜闇先生
流光冉冉逐驚波文物空思晉永和遼鶴重尋舊城郭
當時風致已無多王璉

素樹幽篁圖

余留湖南時墨菴高士扁舟相遇不一月而來數番酒

有殷勤情意堪美醉後偶寫此圖以贈而邱止善適至
復以遺止善雖片紙亦可觀也至正癸卯五月廿三日
偶過伯帚徵士齋中忽以相示轉瞬十有二年矣世殊
事異慨然時同集者德機隱君也素樹幽篁澗石隈

當年贈此好懷開如今寂寞空山裏誰復緘情折野梅
我少陳公十五霜未應白髮視范范句哦夜雨懷無
已冠着方山似李常夏沼已浮蓮蕊碧春衣猶怯樹陰
涼久知服食清虛甚更試山翁煮石方海岳菴圖旦

晚臨摹卽全璧以歸也

筠石喬柯圖

橘窗春雨夜剪燭坐蕭條石上苔紋濕堦前蕙草消池
塘幽夢遠鄉國美人遙古樹荒筠翳題詩不自聊 瓚
老迂遺墨宛然在汨汨寒泉漠漠雲滿紙琅玕題瑞室
含毫頻媿續清芬 孟載題

老夫不向名山老却向何方畢此生白石巉巖秋葉裏
慙慙軒睡夢魂清 絳霄宮崔玄白

石邊古木伴幽篁三友相看耐歲寒
幾度夢回明月夜涼陰移處下棲鸞
碧樹山樵

古木疎篁倚石邊不隨桃李鬪春妍
平生留得冰霜操別有幽期在暮年
青城山人王汝玉

雙樹雨竹圖

甫里宅邊曾繫舟滄江白鳥思悠悠
憶得岸南雙樹子雨餘青竹上牽牛
余自與庸叔別後不相見近十年
矣班荆道舊殆若隔世因寫此以贈瓚

誰將翰墨寫真形思入長空動杳冥不謂吳槎空偃蹇
却疑翠裏久娉婷烟雲曉濕蛟龍影風雨秋生翡翠翎
疇昔扁舟曾入夢九疑山色倒空青 吳郡金誠之

古木竹石圖

倚石蒼蒼玉一枝鵝池雨霽墨淋漓誰如綠水園中客
落日虛亭獨咏詩 六月五日寫贈綠水園主翁并詩
瓚

慨想高人竟杳然只于詞翰閱清妍當年杖屨行吟處

竹樹娟娟墨沼邊
城南曹恕

支機石在星槎遠
棲鳳寒枝暘谷虛
彷彿神遊清閭閣
題詩忍對白頭餘
弄翰焚香閉草堂
高情常與世相忘
如今遺墨人稀得
珍重深宜什襲藏
無錫朱昇

又古木竹石圖

劍光出匣耿秋蓮
磨礪崢嶸濯渭泉
為是一番風雨過

青楓葉下竹娟娟

雲林生

為字一作又

懶瓚先生懶下樓
先生避俗避如仇
自言寓此三株樹

清閨閣中氣已投 老鐵

古人林木窠石本與山水別行大抵山水意高深迴
環備有一時氣象而林石則草草逸筆中見偃仰虧
蔽與聚散歷落之致而已李營邱特妙山水而林石
更造微倪迂源本營邱故所作蕭散簡逸蓋林木窠
石之派也 竹懶

竹石水仙圖

仙子凌波素體輕襪羅微步月華明滿懷心事無人說

來向瀟湘訪女英 至正己亥十二月廿又四日寫為
秀卿仙史 雲林子瓚

倪迂竹枝

岷江疎秀士棲隱闔閭城覓句仍工畫看山不愛名
棊消永日琴調寄閒情摩挲鬚髯美春苗紫過纓 惟
允契友讀書工為歌詩而圍棋鼓琴無一不造其妙雖
遊名公卿間無意于仕進故云爾壬寅十二月既寫竹
枝奉贈又賦此詩瓚

又水墨竹一枝

二月六日夜宿幻住精舍明日寫竹枝遺無學上人并
賦長句 春水蒲芽匝岸生 閭門山色著衣青 出郊已覺
清心目 適俗寧堪養性靈 花落鳥啼風嫋嫋 日沉雲碧
思冥冥 禪扉一宿聽魚鼓 喚得愁中醉夢醒 無住菴
主寶雲居士懶瓚 甲寅

窗前疎雨過石上 晚雲生不是雲林叟 無人有此清

雲門山居士紳

張紳之印
雲門山居

白文

士行父
朱文

瘦倚清風玉一枝
滄溟回首已塵飛
三生石上因緣在

應化遼東白鶴歸

青城山人王汝玉

玉堂清翰

以墨畫竹以言作贊
竹如泡影贊如夢幻
即之非無覓之不見
謂依幻人作如是觀

丁巳逃虛子戲言

隸書

曉出閭門道西山
滿意青金臺有遺墨
寫得鳳凰翎

東皋妙岩

記得曾攜枕簟遊
葑溪溪上草堂幽
比來誰識賢君子

歸卧江南烟雨秋

檀居杜堇

寫竹仍題句僧房一宿淹如何書甲子猶學晉陶潛

鹿場居士寬

元博
朱文

此二首題
于詩斗上

雲林墨竹

陳郎鼓琴初月明能對楚人作楚聲江風動地波撼席
蘆雪撲帳雲栖薨每驚遠道意慘愴忽此聚首心忙紫
賦詩寫圖以為贈比竹貞德琴亮清至正丁酉十一
月五日余友陳兄惟允偕余隱長和過余旅寓為余鼓
楚辭一再行因寫墨君并賦長句以贈時夜漏下二刻

矣筆硯荒落自愧草草惟允當有以教我也倪瓚

又墨竹

市上休疑張伯清藥無二價制顏齡何當埽雪棲幽谷
為爾松根採茯苓 寫贈張伯清茂才并賦雲林子
世間誰比伯夷清曾夢周文與四齡堪笑雲林倪處士
要將竹石比參苓 黃鶴山中人王蒙用韻

日下寒溪淡綠霜前野竹雙清千里水明沙淨一枝雨
偃風橫 馬治

墨染湘南竹影杯分吳下尊羹百世雲林一子陶韋五
字詩名 梁谿倪先生有別業在吳江之上既為伯清
寫此圖復賦詩于右睹物思人臨文嗟悼而已 初

雲林竹石

黃陵廟前雨過邯鄲谷口風生愛煞山人清致縱橫澹
寫秋聲 戊申歲三月余避地雲間始還笠澤元暉都
司以此紙索畫竹石并賦瓚

去年溪上泊輕舟笑弄滄波狎海鷗雲去樓空無此客

寒林留得數竿秋
曲江居士

烟竹圖

曾向瀟湘把釣竿
蒼蒼烟景暮江寒
遠山一脈西來意
付與高人面壁看
淨名菴主寫

樓中寫竹復題詩
客邸春風三月時
似假似真真又假
古人惟有老坡知
四明詹仲和

霜筠圖

戊申十月十八夜
環綠軒中借榻眠
舞影霜筠風細細

紫窗素練月娟娟此生寄跡鴈遵渚何處窮源漁刺船
染筆題詩更秉燭語深香冷一淒然
夜漏午刻寫竹
贈元度瓚

疎竹圖

以中每愛余畫竹余之竹聊以寫胸中逸氣耳豈復較
其是與非葉之繁與疎枝之斜與直哉塗抹久之他人
視以為如麻如蘆僕亦不能強辨為竹真沒奈覽者何
但不知以中視為何物耳
瓚

晴梢圖

雨後空庭秋月明一枝窗影墨縱橫沈君雅有臨池興

瀟洒濡毫託意清

雲林子寫晴梢并詩贈何閎貞士

七月廿一日書

倪君好畫復耽詩瘦骨秋來似竹枝前夜夢回如得見
紙窗斜影月低時 李迪高啓

雲林畫竹卷

老懶無綜筆老手倦畫止乎此倘不合意千萬勿罪懶

璣 陳君惟寅天倪先生令子也天倪為黃清權高士
之甥清介孤峭深似其舅讀書鼓琴不慕榮進澹泊無
欲以終其身惟寅能守其家法者也世故艱巖安貧自
樂窮經學古教授鄉里色養得母之歡心友愛盡弟妹
之和樂詩文綴緝于以為娛予嘗愛其藻麗不羣蕭然
有出塵之想聊摘跋語用歎才華暮春之辰忽過江渚
復示新製相與諷詠因成長句以歎美焉璣頌首
二月十日

下燈

不見陳君動隔年暮春孤坐此江邊
政憂江濶多風雨
適喜君來共簡編
諷咏新詩非漫爾
艱虞遠別更悽然
看花相約重相過
已放柳梢維酒船

募董源畫法

罨畫溪頭喚渡銅官山下尋僧水樹汀橋曲曲風林雲
磴層層雲林

山連青黛樹深藍
家傍溪雲草結菴
畫史欲存招隱意
故將幽趣寫江南
楊士奇

倣李成筆意

邃密齋宇靜風雨暮蕭蕭復此獲良觀
芹苴酒一瓢羣綠淡清閤幽華炫叢條
世事方疚如聊以永今朝 辛

丑五月十日齋居對雨畫此并賦詩倪瓚

一時揮洒聊自適把玩今如徑寸珠
淡泊中含太古意澤之癯有道之腴
卞榮為良貴進士題

偏頭關萬金吾持李營邱真蹟至長安
蕭疎澹宕政如此筆意乃知雲林不獨
師北苑 其昌

又自題山水

歷過風霜不受欺
相親相近石何危
滿池墨水香浮研
正是幽人落筆時
曲全叟懶瓚

爽氣初浮溢野藩
山高石益落秋痕
樹底一窗明簌簌
風聲月色寄黃昏
伯雨

平陽氏舊藏倪畫為元人題

逍遙天地一閒身
浪跡江湖七十春
惟有雲林堂下月
于今曾照昔年人
青城山人王汝玉為伯永題倪懶

溪山圖

疎木晴巒墨尚新清詩佳麗出風塵披圖便覺成今古
詞翰誰能繼昔人 休休翁盛景題

此幅已失其詞語偶錄存敝篋因檢入之玉記

倪王合作

宋紙上潤
幅山水

獨坐古松下蕭條遺世心青山列屏嶂流水奏鳴琴安
得忘機士與我息煩襟幽情寄毫楮趺然聞足音 歲
辛丑四月五日東海倪瓚畫松石望山圖并賦五言奉

寄丈伯友兄且以督屢約屢失期云

蒼崖積空翠怡我曠古心飛泉落深谷泠泠絃玉琴塵
消羣翳豁松雪洒閒襟清謐天籟發如聆正始音 曩
余為倪東海畫此圖後倪自畫以轉惠他人今歸博廣
丈齋中又為畧加點綴補其筆墨未足者復和東海生
韻題識畫端以正其事云 黃鶴山中樵者王蒙

雲林小像

才之美德之精坐陰石儼像形噫安得斯人兮復生

天保贊

產于荆蠻寄于雲林青白其眼金玉其音十日畫水五
日石而安排滴露三步回頭五步坐而消磨寸陰背漆
園野馬之塵埃向姑射神人之冰雪執玉弗揮予以觀
其詳雅盥手不悅曷足論其盛潔意匠摩詰神交海嶽
達生傲睨玩世諧謔人將比之受佩紫羅囊之謝安吾
獨以為超金門之方朔也 句曲外史張雨贊

骨如鶴目如虎即之而雲凝望之而霞舉不據槁梧而

吟迺踞長松之下吾知其為馬少游之徒陶弘景之
伍然個儻之氣足以糠粃一世清逸之懷足以遊覽千
古戢其光芒約之規矩揚揚乎晏安之暇循修乎問學
之聚如是而帶經以鋤者此一秦宇彼一秦宇 京口
陳方子貞贊

顧玉山三教小像

儒衣僧帽道人鞋天下青山骨可埋遙想少年豪俠處
五陵鞍馬洛陽街

謂其人有志于榮進與詠歌彈琴誦古人之書謂其濶
畧于世故與能擴先世之業昌大其門閭逍遙戶庭名
聞京都忽自逸于塵氛之外駕扁舟于五湖性印朗月
身同太虛非欲會玄覺于一致而貫通于儒者耶倪瓚
造戊戌八月法喜精舍樓

崇禎七年閏中秋新霽閱玉山像清腴微鬚頂笠束
玦躡玄舄執孔雀尾扇坐雲鶴褥有書一冊在旁白
描如鐵線然昔年見一幅其題句則天下作到處後

二句云若說向時豪俠事五陵裘馬洛陽街所更凡八
字樂卿記

楊竹西高士小像嚴陵王繹寫

四明鄭氏

珍玩書記

句吳倪瓚補作松石癸卯二月

雲林山水竹西圖左一松右有小竹平坡上王繹貌
竹西高士方巾深衣執杖立于坡間款為前云

三泖之水東流九峰之雲高浮篤生隱人是為楊侯楊
侯之生才質具美能濟之以方來之講學兼本之以夙

聞之詩禮此所以行修而文辭薈而醇迺自號竹西子
欲追踪乎葛天氏人謂其草玄之遐裔而不滯于其出
處進退此所以不戚戚于賤貧不汲汲于富貴既無慚
于次公之穎脫亦無忝于大年之秀發此所以江海知
名而畎畝躬畊夸非溢美論斯稱情吾聞其初度在邇
壽星騰輝乎泖水吾題其像既以文若揆之心宜以禮
能若此則添十祀而一成匪純但以八千歲為春秋而
已也 至正二十二年壬寅歲春二月遂昌山尚左老

人鄭元祐明德甫題

汝豈無相漢之籌而遽從赤松之遊汝豈無霸越之策
而自理鴟夷之舟仙蹤寄乎葛杖勁氣吞乎吳鉤集車
轍乎戶外登歌吹于西樓不識者以為傲世之叔夜識
者以為在鄉之少游 抱遺叟在雲間小蓬臺書

印

鐵史
白文

前不郎于漢庭後不簿于魏府脩然泉石之間樂與漁
樵為伍泣岐之淚未乾不惑之年自許久知其為懷王

之隱仙又行將為雞窠之老父此竹西翁所以為天地之全人有光于四知之華譜也 西礪居士蘇大年撰

昌齡二字白文印
西礪雲樵朱文印

須眉之蔚蒼胸懷之淵亮其所同者不異中人之規模其所異者不同衆志之趨向抱豪傑之才而不屑于濟用具輪囷之膽而不輕于肆放故揮金有五陵俠士之風然愛客有四國公子之量當天下無事託詩酒以娛嬉方海內爭雄遠侯王以高尚所以冠林宗之中曳長

房之杖放浪乎西疇南畝之間逍遙乎九峰三泖之上

噫微斯人吾誰與望

扶風人馬文璧謹贊

漢代伏波將軍孫

挺立雪之標而陋執戟之卑振關西之望而識天下之
奇量江海而不畦趨烟霞而不羈輕探囊之金玉重集
戶之簪裾故瞻具乎雲間而譽流乎海隅但見萬竹之
西高樓渠渠雲山不礙有琴有書蕭然為山澤臞矯然
為列仙儒長欣欣宇宙而襟韻自殊頽仰自如也 句

吳生高淳敬贊

元朴白
文印

薰然而嚴昂然而廉有龐有眉有長有髯巾逍遙而簷
服上古而襜其閒情若陸龜蒙其仙趣若劉海蟾其動
也以恬養智其靜也以智養恬燕處乎風篁之西笑傲
乎雲山之尖世方酣戰乎觸蠻吾方澹造乎羲炎其豈
杜德機而物不可得覘者乎 東海艾衲散民錢翦敬
贊于海上之飛鯨樓

瞳碧而方氣清而蒼髮之短不如心之長有五畝之園
一鑑之塘日晏坐于林堂物與我其相忘其泰宇定而

發天光者耶 席帽山人王逢敬題

梧溪王逢白文
王元吉氏白文

雪鬢霜鬚山中野服進不榮于軒冕退不厭于草木種
數畝之田開一區之宇圖書左右雲山几席此非商顏

之顓翁即空同之仙客也

虛白道人茅毅贊


東海遺
老白文

鶴立長身大布襦綠光瞳子雪眉須才名恥列三王後
丈物看來兩晉無牛度玉關迴紫氣龍眠滄海抱遺珠

憑君更著東維輩畫作雲林五老圖

靜慧

士明
白文



珊瑚網卷三十四

欽定四庫全書

子部

珊瑚網卷三十五

詳校官中書臣沈鳳輝

編修臣程嘉謨覆勘

欽定四庫全書

珊瑚網卷三十五

明 汪砢玉 撰

名畫題跋十一

天真上人像

單條

至人遺庶類建道開鴻濛雲銷鐵弱盡廓如太虛空微
筌舉世人盡為塵所蒙高山安可仰欲追杳無踪千春
桃花巖宴坐誰與同 山中有一士白髮垂兩肩手弄

石上雲默坐無一言泉響茆屋下花落石巖前衆人泊
頽波彼獨全其天騎鸞霧中客胡乃稱神仙 黃鶴山
中樵者王蒙畫并詩

能空一切有為法可斷百年無了緣一喝一捧羸得
機先不立文字却用贊詮要識天真真面目分明只
在未生前 蘭雪坡劉易

海門有大士其名曰天真未離世間相不曾生一塵
至正乙巳夏午日沈叔野拜

大士蚤聞道拔足出凡塵被髮過兩耳貌若鴻荒人
解屨坐苔石松陰庇其身沉默寡言說于焉養天真
樸素堅自守孰得為緇磷世人徒耽慕繪寫想形神
何由往相覲同樂萬古春 環中老人鮑恂

下有橋
李鮑恂

朱文仲
孚字印

海隅蘊秀異靈譽妙無蹤陽輝散空花淖音震祥風
慧識啟荒寂慈喻極罷癘永言贊宏化揆道將無同

張翥

下有張氏
翔南印

山中說法者天上講經來欲補高僧傳慚無太史才
山陰胡隆成

叔明圖天真像筆力精到非天真莫能致叔明非叔
明莫能圖天真誠所謂一代人傑也 石門山人明
秀拜觀

右畫在宋楮上左有大松二枝掩蓋下一頭陀盤膝
坐石上石下有流泉一派此幅純用焦墨而蒼莽閑
雅動人叔明得意筆也千頃生識

黃鶴山樵太白圖

楫楫追三月極儼加精緻便欲無此卷後輩豈可易

右題王叔明太白圖 沈周

葛稚川移居圖

六字王叔明
分隸書圖上

蒙昔年與日章畫此圖已數年矣今重視之始題其上

王叔明識

稚川執杖左攜一鹿後老妻騎牛抱一小兒二童隨
之重山復嶺秀潤之筆非尋常潦草者比王記

石梁秋瀑圖

已刻太
平清話

至正辛丑九月三日與陳徵君同宿愚菴師房焚香烹茗圖石梁秋瀑翛然有出塵之趣黃鶴山人王蒙寫其逸態云

消雪飛泉挂石梁山間疎樹靜蒼茫幽人自愛清秋景閒坐虛窻對夕陽 周伯昂

一道飛湍萬壑流平林如撼錦光浮山翁獨坐有何事洗耳端來笑許由 耕雲題

林際飛泉銀漢長水邊細草紫蘅香
奔雷峽底雲雷起
疑在匡山瀑布傍
陸有恒

洞天清曉圖

霧閣雲窻縹緲間丹崖玉樹絕躋扳
桃源咫尺無人識
海上徐生漫往還
黃鶴山樵

一生居士精神健此筆前生是畫師
南郭子綦今喪我
東方曼倩不逢時
澗溪巖岫絕幽遠
草樹雲烟相蔽虧
亦欲求翁寫東絹
祇慙投老買山遲
河東張翥

山上出雲山下雨樹杪飛泉千丈吐何人結屋雲泉間
滿地松陰如太古丹溪老仙性愛山芒屨竹杖不放閒
江湖安得具小舟挂冠來與此老游 金溪金霖

千巖萬山白雲心自閒結廬萬山深處也分得雲半間
人生良鮮歡世事紛紛行路難早去同尋瑤草莫把
做畫圖看 壺中

金澗飛來晴雨蓮峰倒挿丹霄藥仙樓閣隱嵒嵒幾樹
碧桃開了醉後豈知天地月寒莫辨瓊瑤一聲鶴叫萬

山高畫出洞天清曉筠菴

喬松絕壑圖

一作至正十三年
二月晦日倪瓚寫

蕭蕭風雨麥秋寒把筆臨摹強自寬
幸賴俞君相慰藉
松醪筍脯勸加餐

與倪畫所
題詩相同

甲寅四月廿三日風雨中達侯茂異相訪于晚節軒中
因為寫喬松絕壑圖并賦題黃鶴山樵王蒙

黃鶴山樵傲右丞筆其昌

此王伯穀家藏曾見于南有堂今復與玄宰同鑒如

見社中人 繼儒

題叔明題畫千山春霽

大峰巔巔碧烟起小峯戢戢樹如薺人家住在澗之阿
面面軒窗翠微裏我曾採藥巖西東石門路滑花濛濛
行看野雉雉朝日坐聽閑鳥啼春風可惜別來時節改
地變山傾三千載只今雖苦混泥塗見此崔嵬興長在
嗚呼安得倚空之梯九千尺獨上其巔絕聲跡 林下
野人

高林藹春霽野水浸平沙山脊浮雲合巖腰細路斜攜
琴向江寺沽酒到漁家歸去幽居晚山僮掃落花立
菴

萬壑千巖裏蕭然獨掩門何當從杖履半日共琴樽

江陰卜榮

萬疊千峰凝翡翠一溪新水漲蒲萄仙翁際此風光好
策杖攜琴步野橋吳僧蕭嘉

倣米海岳山水

王郎筆力追前輩海岳新圖入卧遊獨鶴眠松猶警露
孤猿挂樹忽驚秋陶潛宅畔五株柳范蠡湖中一葉舟
同煮茯苓期歲暮殘生此外更何求 璣

倣巨然山水

余見山樵畫多矣無不規摹古人遂足掩抑古人者雲
林所謂五百年來無此君不虛也然諸格中以倣董巨
為最此幅倣巨然又叔明平生第一得意筆畫家以皴
法為第一義皴法中以破網解索為難惟趙吳興得董

巨正傳要用此皴法脫盡畫院庸史習氣叔明是承旨
甥故猶似舅此幅置吳興畫中不可復辨也 其昌

黃鶴山樵清澣垂釣圖

君家清澣上垂釣綠陰中露濕芙蓉月香銷菡萏風移
舟入烟渚橫笛坐花叢自識忘機客無心問塞翁 黃
鶴山中人王叔明畫并題

畫法摹書法求之董巨中宋朝輸米老五代有楊風幕
景烟霞窟秋山桂樹叢惜哉黃鶴者已作雪眉翁 延

陵山樵遂初題

茆屋烟霞裏乘閒理釣絲披圖無限意書此慰相思

文江鄧九淵

此圖為姑蘇寒山趙氏家藏其女孫字子惠者于癸
未菊月攜過禾中尚有宋人西母像冠服殊古雅元
顧定之墨竹瀟洒多出塵之致趙仲穆畫美人題箋
得蘇漢臣姿態而錦文絕非庸筆可到周東村武王
夢卜圖疑是周官白描仇寔父作鍾馗策蹇雖贗乃

後隨鬼卒肩一大筐筐內縛諸魑魅有數小足掙筐
外幻甚又子惠寫生種種是沒骨設色纖艷若移香
影不下其母端卿也余時得其過牆紅杏便面及絹
素花石題蝴蝶花間蝴蝶舞欸書扶風馬昭德隱戲
筆更許補右丞詩意云 課花外史識于軒軒

王叔明山水卷

溪山深秀 黃鶴山人王蒙

秋風動巖樹歸鳥何其翩我思巖中人可以樂忘年夫

君本詞客畫手故作妍吳中圖畫藪肯為時好遷上巖
雲積雪下巖水鳴絃展卷纔數尺坐對兩忘言 句曲

外史張雨題

王叔明為文敏外孫而其畫法自立門戶別取一種
姿態與文敏無一筆相似其品格不下文敏宜矣

高啟

黃鶴山樵精于繪事為古今獨步故此卷不越尋丈
而山川掩映溪谷縈紆林木森茂屋宇參差儼然有

千里綿延之勢而且用筆適媚神采爛然倪雲林稱其筆力能扛鼎五百年來無此君觀此豈不益信

臨川危素

樂琴書所圖

清河張公有秩蚤以明經登第為天子耳目官退食之餘不忘琴書之適故顏其燕息處曰樂琴書所而叔明為圖之 洪武廿三年十月望益齋王彥文跋

溪山高隱圖

原題

我于白雲中未嘗忘青山城府吾奇觀知往不知還往
者不可勸來者又誰關卧看飛鳥還山青雲自閑至
正十八年三月廿七日吳興王叔明為仲賢畫

花溪漁隱圖

在紙
上

禦兒西畔雪溪頭兩岸桃花綠水流東老共酣千日酒
西施同泛五湖舟少年豪俠知誰在白髮烟波得自由
萬古榮華如一夢笑將青眼對沙鷗黃鶴山中樵者
王蒙為玉泉尊舅畫并賦詩于上

終日垂竿古渡頭時人誰識舊風流
暫依此處種桃者還憶當年載藥舟
對景使人懷肉綺入山容我問巢由
得魚沽酒共妻飲一醉忘機笑狎鷗
邵良次韻

此圖有二其在吾里項氏者筆氣高
縱意態蒼遠旁多邵良和詩較勝新安
王氏所藏而余有文五峯臨幅自題云
漫蹟為漁已息機青山綠水自相依一
年好景惟春晝柳絮桃花燕子飛玉水
記

長林話古圖

五字黃淮山樵
分隸書畫上

鐵笛道人從山陰來余值之有余清齋云其處丘壑幽
邃喬木秀鬱僧磬雲埋邛炊霧雜古趾猶存典刑高人
多于寄傲聽罷神悅老鐵復約余秋深偕遊焉作此以
訂未來因緣 至正八年春二月四日黃鶴樵者王子
蒙

草樹離離落照間清言輸與兩翁閒就中消受無人會
滿耳清泉滿眼山 文璧題

王叔明秋山蕭寺

紙上
單條

獨立風前認去鴻
阮生何用哭途窮
空江水急寒潮上
大野風來落日紅
木葉亂飛蕭帝寺
雲情偏護楚王宮
酬恩千里懷孤劍
行李關河慘淡中
邊城鼓角怨清秋
起坐遙生關塞愁
露氣下垂羣樹白
星光亂點大江流
百年南北人空老
萬井升沉世若浮
不為五湖歸興急
要登嵩華看神州
黃鶴山樵王蒙叔
明詩畫叔明又有
蕭寺風雨圖卷為
華谿叟沈良跋俞
燧題于都城寓舍
雲間張遠

魯男子閉戶圖

着色人物
卷叔明筆

雨傾風吼黑漫漫
半死花枝失檻欄
肉顫不禁珠淚迸
全無惻隱不相看
嫂溺手援尚可為
坐懷不亂是吾
師顏家叔子亦魯
產難婦相隨執燭
慈鐵笛道人題

王叔明南邨草堂圖

紙上淺
着色

南邨賦

有序

南邨九成陶先生別稱也先生世家天台幼岐嶷十歲
父兄口授以伏生書即成誦二十有志于科名執筆論

當世事主者忌之即拂衣去將返乎天台守先壑適冠
若于鄉歸弗克遂宿留乎雲間因籍焉樹藝往來不離
乎九峯之南人皆以南邨先生稱之年已七十餘矣著
書累數十萬言不自知其勤也立身之潔終始勿渝真
天下節義之士哉陳留張樞同乎先生之出處合乎先
生之心志年相若也又相知為最深故特為之賦以道
先生之高情云 予將行乎行何居音基乎思取友于遐
隩慨名節之不立兮將何徵乎時流飾時妝以競好兮

曾弗報夫前修索瓊茆以筵蓐兮藐四海之焉求靈氛
盱衡以告予兮道無法而不週爾何瞢瞢于所從兮務
因之以遠遊諒前聖之可徵兮斯焉豈無君子推古道
以諮詢兮固殷周之多士山歲寒以落木兮鬱蒼蒼乎
松柏鳳飛舞而絳繚兮粲雲章之五色爾何遺乎美好
兮棄荆璞而弗識望隱處之嵯峨兮泣平罌之廣衍紛
衆樹之蓊薈兮纂文華以芳紉彼美人之修娉兮眷行
藏于婉婉被慶雲以為衣兮濯甘泉以自潔覽甕牖于

朝光兮聽天雞之啁晰表諤諤以無磷淄兮矧規旋而

矩折挽芳馨以弭章兮函菱荇

上音雞
下音敷

以俟風也矯中

立曾弗倚兮又何疑乎屢空也亂曰南有邛兮雲間烟

九點兮倚似青山星東壁兮燧煜江西流兮潺湲草生

兮書帶風轉蕙兮汎崇蘭披汗竹兮霜班班菊晚節兮

桂花丹鳶飛兮魚躍波動盪兮天寒雲間非夫人吾誰

與兮又何訪遺逸乎商顏

桑柘村深泗水南居民畊織力田蠶草堂燈火書聲起

錦里杯盤野興酣
抱負久知經濟用
栖遲惟恐利名淹
扁舟來往鷗波裏
時與高人共盍簪
泰窩道人吳興
錢雲

南邨老人清且臞
閉戶十年工著書
諸生解問楊雄字
使者空求顏闔居
推窻山在夕陽野
掃徑柳垂春水渠
卜隣若得遂吾願
日日抱琴無日虛
吳郡張洙

南村草堂記

南村草堂者陶君九成先生隱居之所也先生性冲澹

不樂仕進厭囂塵湫隘遂徙家南村焉村之俗悉事農
桑溝洫後正禾麻橫從雞犬聲相聞桑梓之陰蔽野當
古蹊水曲喬木童童若車蓋而秀鬱者又不可以名狀
也俗尚淳龐詭行異服者屏不與處而田叟埜老知古
今非法言不道率子弟之趨事赴功者弗後期暇則相
與飲勞歲時伏臘有加焉以故先生樂其里俗之美願
為終老也鉉齒少且賤承交于先生者有年矣不自意
終歲竟生浮湛而所謂南村草堂者嘗一接于夢寐間

也衰老荒落焉能以文為哉竊惟爾祖陶處士為晉一代偉人方其居南村也必曰聞多素心人迺住居其宅當時交際者豈無名公鉅卿而堂高數仞丹檻藻梲者何欲而不得而獨園堵蕭然介然而不與世狎其懽懽暢洽乃見于田舍數人由其素心暴白以此而感彼不以一毫有累于其中千載之下聞風而企慕況在其子孫心同氣應者乎詩曰維其有之是以似之是為記沈

鉉撰

晨旭兮熹微宿露兮淒其君子履茲兮惕焉孝思追先

德于久遠兮敬厥祀而弗遺

春露祠

江沙兮如雪野竹

兮森列眷言故友兮綢繆話別啟柴扉以循步兮見衣

上之明月

月色柴門

厥居兮高明秋爽兮氣清簡編舒卷

兮對此韓檠羌伊吾之不絕兮維聖賢之是程

秋聲館

西疇兮春及東作兮靡忒戴星而畊兮冒雨而息彼冤

紱之雖貴兮寧易予之襜褕

襜褕所

吳郡顧祿謹中謨

南村記

橫泖去吳淞不五十里自泖而支于東南者曰泗又東而水勢益險峻曰蒲潮汐往來折入于海西睇九山若鳳翥駝奔雲卧中伏烟雨霽蒼翠落几案並橫泖而聚者為村民俗尚古吾友陶九成先生築草堂以居焉先生讀書養素得其趣則曳杖于松溪菊圃之間疲則箕踞于平坡磐石之上或登高眺遠則九山之秀與目謀泗水之清與心謀林木之蔚茂者與神謀也號曰南村盖有得夫晉庾亮登南樓于清秋之際陶處士見南山

于采菊之時矣記未獲來徵余言余曰亮本善清談之
流闇于識而短于才駐師武昌未聞有所規略至末路
之窮乃乘月南樓與浩輩坐談以為興復不淺竟無補
于中州之多故吁亦踈矣若處士則悠然南山其澹泊
深遠之情思感慨之狀付之忘言視亮之談詠光景豈
不霄壤哉今先生所居之村平林遠岫拱立離向闕其
門則知宇宙之恢廓敞其軒則知雲烟之散聚鑿其牖
則烏兔之飛走者在乎目之一矚也此南村之所以為

南蓋本于南山悠然之趣而南樓之賞不足以喻夫南山之勝南山之勝即先生南村之勝信可知已他日子舟南歸當攜琴訪先生于南村坐南村以鼓南風之操斯又一時佳興云 洪武甲子冬十月十日東吳全節譔并書

草堂結構溪南村南極夜照如朝曦南村老人應星象北山徒著移山文鉤簾看雲自怡悅銀蟾飛上青山缺烏皮曉坐凌秋空金碧九朵開芙蓉東村槌鼓迎春社

西村育蠶盛桑柘甘霖既敷停桔槔黍禾秋深接農舍
老人此時心炯然殮霞漱玉希神仙長生豈無石間髓
洗耳更有山中泉爬羅剔抉藏奇古草堂又作圖書府
折分穗書精鳥書陳倉親鑒宣王鼓浣華溪頭花自春
浣華老翁徒苦辛亂離奔走皮肉皴何如栗里羲皇人
羲皇之人豈求仕八十餘日縛塵市一朝解印賦歸來
來落南村避徵使南村五老居赤城赤城繞屋烟霞明
壯年東遊不歸去袖挾寶劍雙龍精厥祖移家金積上

山中避人呼宰相雪班老鹿駕輕車路入桃花隔封壤
子孫蔓延多隱居眼方獨授丹臺書草堂昨夜燒丹竈
丹光一道飛虹蜺嗟我塵寰苦煩擾仰視南村若山島
欲攜鐵杖叩高堂引訪安期索瓜棗 陳留張璧識

王叔明蘿壁山房圖

小卷在
紙上

綠蘿蔓蒼壁花香散春雲松房孤定回袈裟留夕薰山
高蘿月白獨立霜滿巾迴風振層巔岵雪洒餘芬昔在
淨名室雨花不露身心空諸觀寂漏盡本無因孰與幽

境會賞竟無纖塵心期後來者矯首空嶙峋 余在龍
河濟玄津持此卷求余畫蘿壁圖并賦此詩老全室一
見頷之而微笑是夜余閉戶熟睡夜深扣戶甚急起觀
之乃全室也口誦前詩數迴相與噓笑至五鼓方去及
旦遂題于卷首 香光居士王蒙叔明識

石壁掛青蘿禪房在其下松枝裁作扉茆覆不用瓦若
人百念忘襟懷自瀟灑行看塢雲生坐聽巖泉瀉怡然
朝復曛在境無取舍于中亦不存何有空與假一從入

山來見山不見野寒拾千載人誰是同流者 壬戌秋

全室叟宗泐識

季澗

開士栖禪蘿壁下茆舍纔堪庇風雨堦前咫尺生白雲
簷底尋常卧馴虎一念情忘萬境融印心不用楞伽句
飢有松華渴有泉屋破自牽蘿薜補愧我移居山不深
又著袈裟聯鷺序聖恩念老賜還山濯足靈源訪支許

會稽具菴如玘

太休
白文

青山多綠蘿綿綿掛石壁秀色無春冬佳氣連朝夕中

有坐禪房巖扉窅而寂日出芝草香烟消琪樹碧心空
境亦忘居安身自適不學解空人天花繞其席 洪武
十七年四月一日南屏山人同菴夷簡記

懸崖薜荔接雲長正愛幽居在上方涼月紛紛秋弄景
晴陰冉冉畫生香故依青壁置蘭若差勝翠微開竹房

況是千巖搖落後盤空秀色更蒼蒼 中吳弘道

存翁
白文

蘿壁非常玩高僧獨愛之蒼松同壽色老石借春姿引
蔓斜連屋垂花直下池茶筵賓客散坐到月來時 錢

唐沙門德祥

青蘿壁下一僧房長日惟燒一炷香風在竹欄人在定
鳥啣紅柿落柴牀余侍先師于南屏時見題此卷意
不盡復述一絕迄今四十八年矣西宗意藏史出示故
書于後 前中峯守彝書

蘿壁山房記

山房以蘿壁名者乃昔濟上人禪息之所也上人字玄
津性純粹清雅以解吟工書鳴于禪林當時名公多重

之者王君叔明為繪山房圖題詩識之全室存翁具菴
同菴止菴諸老師皆聲詩咏美玄津既沒餘五十年詩
卷今為西宗意藏主所有予來南屏一日西宗出卷示
予且曰意生也晚志慕古人當宗門全盛時諸老宿以
道學相傾意以是時不得身侍巾舄于其間為歎巘居
谷處草座麻衣世慮澹如獨慕古之心時往來于懷也
忽交與有好事者以蘿壁山房詩卷見遺展玩欣然如
親接對古老顏色因自喜以所居山房就名蘿壁其圖

與詩如子素有而復歸于子者也夫道目擊耳聞無乎
不在顧力行何如耳豈不聞靈雲師之于桃花乎上座
之于畫角聞擊竹聲見弄師子皆足以發明向上一著
子慕古人志在古道盡以靈雲輩自任豈求于彼而不
察乎此必俟得古道于古人耶子其勗諸若乃山房名
寔今昔不二諸老師所賦詩見之矣是為記 宣德五
年秋九月初吉淨慈住山天台沙門釋正需書

蒼珉逗纖根翠蔓鬱盤結葉密珠瓔懸枝斷釵股折悠

悠鑪篆銷寂寂啼鳥歇味禪坐深更虬髯弄明月
前
普福住山大振

叔明靈石草堂圖

在紙上水
墨掛幅

草堂之靈鍾山下靈石山中有草堂堂前森列皆石友
具服再拜庸何妨晴嵐入簾凝研席暖芸吹香撲書帙
客來無物款清談旋束荆薪煮靈石 夢菴

坐深殘醉醒簾捲草堂開擁座千峯出橫空一鶴來晚
風松落子時雨石生苔却憶山中客披圖日幾迴 彭

城劉鉉

山中靈石碧嵯峨高士茆堂住澗阿幾樹松陰當戶密
四時嵐氣入簾多依依猿鶴常相近寂寂親朋遠不過
遙望西巖泉落處臨風時咏考槃歌 吳人錢紳

芝蘭室圖并記

前書寶石泉壑四字後
款云王蒙畫俱篆字

苾芻香草也西土以名僧言其芳薌遠被薰襲羣草氣
變形隨亦由僧之化俗使其改惡從善也楚騷以蕙荃
比君子蕭艾喻小人舉世皆愛荃蕙而惡蕭艾古今人

情之所同固無間于遐邇也薰猶不可以錯糅言君子
小人不可以同處也靈均辭微而旨遠至如采三秀于
山間紉秋蘭以為佩言善人君子終身親近不可遠也
古諺有之與善人交如入芝蘭之室久而與之俱化夫
芝瑞草也一莖五色三秀九岐菌生嵩華丹屋之上食
之者千載不老蘭香草也綠葉紫莖丹葩玉齒越山楚
澤幽芳襲人此二物草中之瑞而香者也集而為室壇
壁楣橑無非芝蘭雖以茝施之滋蔓荼蕒之苦臭淹漬

既久安得不漸其瑞而染其香哉今以剛愎之資柔佞之質得與聖賢久處服其衣冠聽其言辭周旋禮樂左右規矩惡得不與之均化哉遠而西土近而中國聖賢之教人每取喻于草木蓋此之易曉而樂于從善也錢唐有大苾芻曰古林昌公幼祝髮于寶石山律戒精嚴智慧明了金函秘典日誦萬言于是分淨慈之半席主法會之首座暮年築室于城之東偏繪塑大覺金身圓通素像歌頌讚頌不舍晝夜乃闢西清離立奇石移植

紫藟樹列蘭蓀倚檻則清心濯目憑軒則衣芳佩馨光
淪日月香動徹飈古林于時宴坐室中招諸徒立廡下
語其法嗣善福田樹以芝蘭所以集善友也芝蘭名室
所以成就于已也從香起觀因義了心推一義而窮萬
義窮萬法而歸一法理事既除法塵俱淨此覺皇之教
也汝能因芝蘭之香瑞纒類尋源當為優鉢羅芬陀利
乃天人愛見之奇華無盡根剛陀羅樹為救世清涼之
妙藥苟能如是返觀從起實因芝蘭之室有以啟之也

弟子再拜曰唯子聞而歎曰是芑藟者可謂善教人者
矣因香草之灑流也而知芝蘭可以化質復馴致乎悅
世救人及其至也則此心之芳香不假外物無復形穢
將普薰一切世界矣奚止事一室哉王蒙于是乎記俞
和書

不著維摩獅子床芝蘭為友座清香商巖采到連莖瑞
楚畹傳來奕葉光春雨芑藟還並秀曉風薜蘿每同芳
也知臭味通玄化物我冥現與世忘 豫章蒲菴來復

築室古城曲樹此蘭與芝異芳間奇石宛有山林姿芝
蘭日長茂離披滿前墀綠葉泣朝露五色含晴暉道人
方宴坐境寂神不馳色香了無取眼鼻忽若遺嗟予老
京客無地結茆茨浩歌望江水白雲有餘思 臨川危
素

不以芝療飢豈用蘭為佩芝秀蘭自馨植此一室內道
人結習盡與物了無礙白晝敞禪扉羣峰遠相對 南
屏山人夷簡

草中惟有芝蘭好不數宜男指佞賢近喜亦從蕭寺種
誰云獨許謝庭專尋常道氣留君子窈窕風姿媚佛天
何用梅檀林下住只將瀟灑度年年始豐徐一夔

芝蘭百本遶階墀
眩眩瑤英間玉蕤
楚畹光風搖綠葉
漢廷春雨長銅池
香飄衣袂堪紉佩
味入齋厨足療飢
謝氏芳華歸寶石
封胡羯末宛同時
白雲峯如蘭

禪局閉幽寂
石室生清芬
奇葩雜芳樹
藹然祇園春
如何尋丈間
迴與人寰分
聲聞已知妄
色相元非真
浣以

甘露枝淨灑濁世塵餘芳尚可即相從問正因
錢唐
白範

紫芝采為食幽蘭紉作佩聊復助熏脩庶幾堪傲世一
室靜生香諸塵自融會蒲團禪燕餘經卷了空外嗒然
吾我忘誰云有三際
京兆宇文公諒

隱居結蓮社地僻無人聲瑤草穿堦綠幽蘭入夢清吟
詩憐楚澤分坐憶南屏色應千花偈香同九畹英何當
風月下相對說無生
金華宋璣

泉石閒齋圖

掛幅

冲懷澹如水萬境猶虛空忽聞還山詔喜入衰顏紅山
中何所有手種石上松茅屋閒無人恒有雲氣封清燈
照佛龕壚烟裊松風砭崖噴飛泉赴壑如撞鐘羣響自
起滅聞心本無窮塵銷諸念寂夢覺非有蹤九旬談一
妙正爾開盲聾孰持去來影觀作真實同去隨流水遠
歸與雲相從無心任玄化泊然齊始終秋風動江漢波
浪皆朝宗雲帆掛海月渺渺五湖東黃鶴山中樵者

王蒙書并題

天竺日章法師得旨還山王侯叔明作泉石間齋圖
子乃題詩并為贈行

奉詔還故山江船復東下獨帆如蜚鴻秋日照平野王
侯贈新圖山水儼幽雅石崖天際高茆屋長松下清香
散佛龕妙觀了空假白雲席上生碧溜階前瀉神清境
自閒所適無取舍佳趣正在茲健筆老能寫乃知遺世
情獨有還山者安得添我身齋居共瀟灑 洪武乙卯

秋龍河宗泐書

隸古

三年京國住奉詔得還山
猿鶴驚猶識雲松故自閒
銅餅瓜蛻綠笋坐豹遺斑
莫熱龍香鉢留將在世間
東臯妙聲書

王叔明坦齋圖

圖下有慎獨清賞四字
向為余家鑒藏

老來自覺筆頭迂
寫畫如同寫隸書
老鶴一聲山館靜
道人正是午餐餘
坦齋老師出宋羅文紙
命作泉石老年自覺不同作
此應命不記月黃鶴山人書于坦齋

仙館

叔明阜齋圖

與太平清話
所載者異

此圖彷彿竹裏館
茆茨翛然傍川水
倚床張冊白日長
復有孤桐置髹几
沈周

叔明聽雨樓圖

在紙工卷首篆書聽雨樓三字
欽云玉雪坡下周伯溫白文印

至正廿五年四月廿七日黃鶴山人王叔明于盧生聽
雨樓中畫生名恒字士恒時東海雲林生同在此樓
雨中市井迷烟霧樓底雨聲無着處不知雨到耳根來

還是耳根隨雨去好將此語問風幡聞見何時得
鐘動鷄鳴雨還作依然布被擁春寒
樵人張雨為盧

山甫題至正八年二月十一日

河濶樓低雨如洗祇疑身宿孤蓬底
清晨倚檻看新晴
依舊山光青滿几
聽雨憐君隱市中
我憂徭役苦為農
田間那得風波險
朝朝愁雨又愁風
荆蠻民倪瓚

虛牖濛濛含宿霧
瀑流礮響來何處
江湖近向枕邊鳴
林風又送簷前去
挾水隨雲自往還
根塵不染性安閒

多情一種嬌兒女淚滴天明翠被寒 至正廿五年歲
在己巳盧士恒攜至綠綺軒見示輒走筆次韻貞居外
史諸韻以寄意云陶蓬寄亭中人暨諸名勝當不默然
也後十又八年四月九日璣記

擬張外史倪隱居聽雨樓詩韻

細簾聲浪縈香霧幽人高卧雲深處月明叢桂小山空
疎烟白鳥滄江去浮沉里社樂蕭閒大隱何妨市井間
拋却喧啾清洗耳草樓六月雨聲寒

易五六韻語
前後乃協

塵生兩耳何由洗喜聽雨聲茅屋底灑然心地自清涼
靜對爐薰時隱几乾坤納納懸壺中書田霑潤稱書農
也勝江湖風浪惡客舟飄泊怨秋風石礪老樵蘇大

年

隸古

城市不著耳江湖留此心樓高人更靜唯有夜懷深

醉翁

倪隱居索和張外史聽雨樓詩走筆二首答之

海氣雜嵐霧聽雨宜高處風雨無時無倏來復倏去搖

搖心懸旂胡為不自閒老人曾聽雨無被不知寒
頭面都不洗聽雨重屋底兩耳任喧聒坐隱烏皮几筆畔
墨畦中自造如老農二仙隔今古神交在閭風堅白
老人書于素行精舍

一榻春深雨滿樓杏梢微濕五更頭東風更綠江南岼
賣劍家家盡買牛荷氣香飄竹外樓雨聲滴碎采菱
舟南風一夜生新漲魚鳥還知此樂不積雨生涼轉
蓐收碧梧初實滿城秋鄰家不識余心樂也愛書聲在

小樓 天地嚴凝萬壑冰不堪寒雨灑孤燈一樓清氣
猶宜雪紙帳生春睡未能 曲江錢惟善

春雲靄江郭鳩鳴朝夢餘樓中雨颯至煩抱澹云除歷
歷樹聲亂蕭蕭牕影虛如何門外客泥潦後行車 渤
海高啓題

山牕聽春雨冷氣襲病膚鋪床閉齋閣衣被薰香爐風
燈苦屢挑夜茗亦再呼煩囂悉屏逐妙理在跣趺憶子
草樓底茲情還有無 齊郡張紳

承平時貞居張道師與雲林倪徵君並以翰墨風致
齊名吳中二人者亦雅相引重先君子與貞居游最
蚤余時以童子侍坐隅尚能計其丰采今先君久已
棄諸孤貞居亦化去天下多故而余始得從雲林君
遊至正乙巳季夏之九日余謁君于盧士恒氏之聽
雨樓獲觀近製詩若畫冲襟雅論令人塵慮灑然既
而士恒出此卷徵題二君之作具在因賦存歿口號
附于卷末以寓感之思云

華陽洞裏烟霞閉靈石山中草樹荒惟有小樓曾宿處
年年春雨滿滄浪黃冠野服神逾玉畫筆詩篇老更
奇白首故人無在者小牕殘燭雨來時尋陽張附鳳
江雨飛來夜氣澄小樓高處冷于冰聲留蕉葉頻欹枕
影亂簷花獨對燈遠客異鄉生白髮故人今夕擁青綾
致君堯舜慚無術思入湖天睡未能淮南馬玉麟
草樓聽夜雨春燈隔重簾瓶中新茗煮奩裏舊香添風
珮潛歸浦雲璫亂綴簷乍驚來湛湛更覺去纖纖頗被

風相妬還疑雪與兼喜隨漁艇泊愁怕客窻淹頭白盧
貞士高情苦未厭 雲門山人張紳重題

山風滿樓來雨脚耳底蕭蕭生遠情還丹化鶴度句曲
破屋無人住洛城酒停深夜蒼燈在簾近餘寒濕葉鳴
枝上漆書空爪迹繞簷依舊落春聲 觀外史所題山
甫盧隱居聽雨樓詩詞翰瀟灑令人有超然之想噫故
物也士恒其慎藏之四月七日王謙寫于客居

更深樓外何蕭瑟半帶滄江遠樹風疑是千秋霜葉下

坐殘一穗燭花紅
斯人雅致今安在
此夕幽懷孰與同
老我題詩成感慨
雨聲有盡思無窮
吳郡盧君山甫
舊有聽雨樓
山甫歿二十年而斯樓尚存
余抵吳惜不得見其人
今其子士恒攜張外史所題詩來示余
余覽之不勝感慨
遂為賦此
至正廿又五年四月一日
槁李鮑恂書

奉題聽雨樓

飛樓何凝陰
雨氣正含霧
蕭騷習羣雷
浙滌散高樹
聲

懸長風外坐想當瀑布習喧久漸息靜寂乃真趣陰晴
造化意年芳暗中度白髮如散絲憑君寫幽素 開封

鄭元

雲林夜澄寂有雨瀾更佳漠漠著樹穩霏霏度簷斜入
靜意所便爭喧競浮誇弛張任索籥細大無根芽妙運
出玄造至理忘紛拏變化本因妄聲聞耳生瑕不如且
置之攝心靜無譁危坐不須寐呼童剪燈花 卧龍山

民王宥

勝國之季兵變之餘前輩翰墨存者無幾間或獲一
見如遇雞彝兕敦不由不使人忻艷也聽雨樓詩句
曲外史及一時名流所作詞翰兼美亦希世之寶也
吳中盧士恒父藏于篋中一日出示于余余展卷觀
之卷中作者多余故友茲覩其辭翰儼若覩彼風度
而不忍釋手也士恒宜珍藏于家慎勿輕示于人焉
洪武二年春二月初二日吳僧道衍書

層檐集飛雷深砌走鳴瀑餘聲殷天籟清氣入林屋風

波任喧洶燕坐暝雙目冥身得蕭爽洗耳絕塵俗香穠
鬱水沉簾花映湘竹篝燈動春酌剪韭留夜宿與客對
床眠清談未云足 金陵嚴瑄

幽人愛樓居燕坐風雨夕高檐瀉飛湍空除墮殘滴傾
耳疑枕流屏喧時岸幘江聲晚蕭蕭樹葉寒策策境絕
迹更起趣澹情自適霽曉愜凭欄春深杏花色 浚儀

趙淑

少年聽雨歌樓上銀燭昏羅帳壯年聽雨客舟中天濶

雲低斷雁叫西風 而今聽雨僧廬下鬢已星星也悲
歡離合總無情一任空階點滴到天明 右竹山先生
所賦之詞今偶獲觀此卷因舉是詞誠甫俾書于卷末
夫聽雨一也而詞中所云不同如此蓋同者耳也不同
者心也心之所發情也情之遇于景接于物其感有不
同耳誠甫中年人有樓聽雨吾意其與在僧廬之下者
同其情誠甫乃曰吾聽雨吾知在吾之樓而已遂書竹
山姓蔣名捷字勝慾義興人卷中諸先輩之詞之腔虞

美人也 奕

集聽雨樓諸賢記

右張雨字伯雨號句曲外史武林人學道三茅峰而才名滿天下若虞文靖公黃文獻公咸推重焉先生妙于書人得片紙以為寶至今好事之家多蓄之客至則相與為玩先生詩法黃太史清新高邁不流于衆雖元氏翰林諸公皆以為不逮也

倪瓚字元鎮號雲林生無錫人家最饒而先生脫畧

紈綺一事于翰墨作為詩章妙絕一世人欲不服自
不能不服也虞文靖公張外史伯雨深相契焉然先
生性癖傲物多忤于時元末棄家泛舟五湖三泖間
興至則捉筆寫烟林小景或竹枝偶流于市好事者
爭買之雖千金不靳也

王蒙字叔明吳興人號黃鶴山人趙松雪之外孫也
素好畫得外氏法然不求妍于時惟假筆意以寓其
天機之妙為文章不尚矩度頃刻數千言可就君子

咸以豪士目之

蘇大年字昌齡揚州江都人元之翰林編修天下亂寓姑蘇為文章有氣不喜衰頽江海襟懷亦人中之豪也

饒介之號醉翁江西人元末寓姑蘇以跌宕自任工于書法君子評之者謂渠不減懷素至今人家多有之

周伯溫號玉雪坡饒州人為入慎重為元氏左丞天

下亂流寓胥臺而無所就然妙于古篆得趙文敏公遺意字頗肥而玉潤可愛士君子至今寶之

錢惟善字思復松江人元末進士精于詩得杜子美法不苟作作必臻其妙

張紳字仲紳濟南人慷慨激烈不瑣瑣于世事作為詩文雖不經意而自成一家能議論終日疊疊不能休蓋北方豪傑之士為本朝浙江布政

馬玉麟高郵人為元長洲縣尹有政聲括蒼鄭明德

先生有碑卒于偽吳

鮑恂字仲孚嘉禾人元氏乙亥科易經進士為本朝
文淵閣學士為人慎重不可狎而學行名天下有學
易舉隅行于世後以事累卒于外

趙淑字本初紹興人元氏乙亥科書經進士龍馬賦
為時所重稱然性耿介不易與人交交必久為本朝
太學博士而歿

張羽字來儀一名附鳳與高啟行輩也治易工于文

文學歐陽子縝密宛轉可愛雖前輩皆自謂不及也
本潯陽人避亂寓湖州為本朝太常博士而終

道衍字斯道姓姚氏姑蘇人弘才茂思為時所稱與
張來儀高季迪輩皆以文字相頡頏而澡身浴德則
非諸君所能及故天下皆以參寥潛子目之皇上龍
興以贊佐功封少師賜名廣孝益又以元之劉秉忠
並稱云

高啟字季迪姑蘇人身長七尺而妙于詩得唐人體

裁語精意圓句隱而暢前輩有所不及為本朝編修
歸家以事卒

王謙字鳴吉姑胥人以春秋學為府學教授
王宥字敬助與高啟能文

陶振吳江人有詩才然性不羈人或易之

韓奕字公望吳之良醫也好與名僧游所云蔣竹山
則義興蔣氏也以詞章名世其清新雅麗雖周美成
張玉田不能過焉

右聽雨樓詩卷其間所載皆一世名士誠可寶也然
余觀卷中人品有三其至高者聞而知之其次者事
而知之其又次者交而知之若伯雨張公元鎮倪公
其殆最高聞而知之者歟自叔明先生以下余髫年
曾事之自來儀以下余少曾交之總若干人皆能以
文章名世者也然自衍公外多湮沒無聞至如伯雨
元鎮二先生若精金美玉不可泯滅況其負超邁之
才遺世獨立高潔無累周覽六合盡大觀而無遺乎

余幼在鄉里時嘗聞吳城盧士恒家存此卷欲一見
不可得見者無不愛惜今吾友沈誠甫得之良可賀
也誠甫寄至京索題始得焚香展卷清風凜然毛骨
頓爽予復何言姑述卷中作者諸先輩出處大畧以
為諸賢之記誠甫姓沈名睿號存畊有才識善吟與
士大夫游予之布衣交觀斯卷者當仰其清風素範
益厲其德哉勿以吾言為謬 永樂五年歲丁亥二
月初吉翰林侍讀學士奉訓大夫錫山後學王達識

右聽雨樓詩畫一卷元季及國初諸名公為吾蘇盧
山甫父子之所作也永樂間流落錫山沈誠甫氏誠
甫嘗求王內翰達善記卷中諸公出處之大畧藏之
以為至寶中念淳熬擣珍非遇易牙不足以知其味
之美雲門韶籟非遇師曠不足以知其音之妙使後
或非其人不視為篋中之故紙而覆諸醬瓿者鮮矣
聞吾相城沈翁蓋淵博雅好古其子若孫多賢而且
才必能鑒賞乎此可以寶藏于永久不遠百里時以

奉翁翁一見之喜乃以厚禮答之既而即瀕溪小樓
扁以聽雨置卷坐右暇日輒游玩諷詠恍若接諸公
之光儀而聆其謦欬也一時名人勝士登斯樓披斯
卷未嘗不心醉神怡斯樓之名遂擅勝于東南是雖
翁之高致所就然亦豈不以斯卷之所在乎或曰諸
公無恙日翁多親炙之者惜乎此卷不為翁作而為
盧氏故物也余謂不然夏后氏之璜封父之繁弱豈
為魯國而制耶魯之先公所得分器子孫世守之以

為至寶斯卷也其璜也其繁弱也翁之子孫寶之而
守之又奚知其為盧氏物耶翁之孫啓南出以示余
偕贅于左方云 成化庚子清明日長洲陳頤識

永之
白文

咏芝
白文

王叔明舫閣圖

汪氏鑒藏

遠山晴翠潑空來浮閣虛窻面面開檢理殘經無一事

焚香啜茗話天台 黃鶴山中人王蒙為九成

香光
居士

溪流清急石盤紆虛閣深藏閭苑如神矣香光閑灑墨

一林松色蔭幽居 臨川危素

太僕

王叔明破窻風雨卷

卷首隸書破窻風雨
四大字款云古田

紙窻風破雨泠泠十載山中對短檠老矣江湖歸未遂
畫間如聽讀書聲 劉君性初以破窻風雨自居諸公
賦詩成卷因作此圖併題絕句于左時至正廿六年歲
在丙午暮春之初 王蒙

環堵篝燈夜寂寥欺人風雨更蕭蕭詩成驚落雞窻筆
夢破須來馬鬣瓢萬里浪開看異日連床屋漏耿今宵

丈夫莫袖為霖手欲沃人間九土焦

雲松陸居仁

陸氏

宅之硃文

居仁白文

破窻風雨記

大名劉易性初氏蚤從宣城汪先生遊後值兵變辟地吳中今年從吳興來見余草玄閣出玉坡周公所篆破窻風雨四大字蓋書汪先生贈語也求余文志之余聞破窻在錢唐時夜半讀書有颶挾怒濤從海門來肆其暴烈揚沙飄石怪雨與之俱若萬騎出祈連北麇于大

漠而矢石俱下若螭龍決起千丈而滄溟之水倒立若
黃河自天而落束以龍門呂梁而雷鳴電噴也崇城如
山者圮層觀如雲者墮其破窻如一葉漏蓬下寒磧上
人懼其有不可支者明旦天地清霽賢郡長有過而詰
之曰劉子破窻尚無恙否吾饋酒醪解汝愠性初啓窻
一笑曰吾由敬亭過武林入雲門下苔雲遭風雨者凡
幾吾皆安以為常子何置戚戚于其間哉而噀酒共酌
歌老杜秋風破屋辭以洗其中之磊塊者亦亂世一奇

士也雖然少陵破屋不為一已憂而寓憂者天下之寒士也惟少陵能安秋風破屋而後能推大厦萬間之庇性初能安風雨破屋而後能居玉堂雲霧之憲吁處變而不失其常居安而不忘乎危是在性初性初謝曰某不敏敢忘先生之規至正甲辰嘉平初吉東維叟會稽楊維禎記

破窻風雨記

大名劉聘君遭世難走楚越間居無室宇所至即浮屠

老子之宮而假寓焉每風雨連夕燈窻獨坐韋編相對
誦讀之聲琅然與風雨相叶蕭蕭啾啾若環佩之鏘絲
竹之沸發于簷牙接于人耳于以見君之學之勤而志
之有在也翰林直學士汪公叔志過而賢之名其所寓
曰破窻風雨而謁記于薊人李繹繹知君者也為言曰
卑宮惡室人之所惡所不處也而君于牖戶之間研覃
經籍如居層軒高棟然則其志可尚矣淒風苦雨人之
所厭所不願也而君于陰晦之時吟詠篇章如遇光風

霽月然則其守又可嘉矣抑聞昔人有以席為門而處窮厄者終能佐明主以定天下君之志其斯之志歟又聞有大雪僵卧而不干人者終能配往哲以垂令名君之守其斯之守歟由是窮而能達蓄而能豐向也蓬室環堵以棲遲今則朱門大第以容與豈非耽學篤志之驗窮經稽古之力耶坐有客作而前曰子之言足以復劉君矣遂書以遺之君名易字性初今寓吳興魏之貴宦仍以君祖父為稱首云至正一十有三年能集癸卯

冬十二月朔旦記

蘭雪子脫畧干戈外踰十年未嘗有憂色所至讀書雖敗壁頽垣霜晨雪夜不倦斜風橫雨有所不避也一日持枯腰軸過小蓬股曰吾讀書處號破窻風雨吾師汪翰林先生所命也鐵厓先生記其端文雄詩豪繼其後者珠貫玉疊公其無一言乎哉予應之曰列仙之儒之言倬乎雲漢之章矣予尚何云雖然當破窻風雨之時人不堪其憂而士之讀書窮理其間者不改其樂也是

故觀風雨之勢足以助吾氣之浩然聽風雨之聲足以資吾趣之灑然風檣陣馬不足為其快也龍吟虎嘯不足為其壯也金春玉應石裂竹折不足為其清也峻宇雕牆璇宮瑤臺雲窻霧閣不足為其坦而幽安以樂也當是時豈知破窻之陋風雨之厄哉破窻不能陋風雨不能厄則吾之神爽飛越若騖紫鸞駕白鶴度銀潢遊碧落上玉京以登五城十二樓也果能若所造則羣仙之地位清高隔風雨者吾將告之以百萬億蒼生命墮

顛崖受辛苦也雖然未造乎是則憂民之憂者必先憂
已之憂樂民之樂者必先樂已之樂憂之如何憂其不
能正已而已樂之如何樂其不復徇欲而已吁吾靈臺
丹府若泰山盤石之安若青天白日之明若松泉蘭雪
之潔則吾所處之地破窻之破自破而吾丹府之窻不
可破也破窻之風雨自搖撼而吾丹府之窻不可以搖
撼也則吾廓寸地于八荒開冲襟于千古者風雨且不
識又安知所謂破窻也哉士不可以不弘毅吾于蘭雪

子不能無所勸云東海濱艾納老友錢鶴叙

一燈風雨寒窗破讀書不知秋怒號恍如扁舟在江海
但覺四壁皆波濤對牀高卧無此客倚劍長歌空二毛
曉看庭樹故無恙千峰雲氣落青袍 武夷山樵者錢
惟善

劉郎讀書如學仙朝不出戶夜不眠時聞破窗風雨夜
正是澁心對聖賢苔溪王子圖景象敬亭山色青連天
執經念子最清苦疊疊論道心相傳雞鳴喈喈天欲曙

疏櫺蕭颯寒聲度庭前漂麥總不知屋上捲茆寧復顧
人生窮達那可知玉堂金馬自有期青藜他日夜相訪
却憶破窻風雨時 宇文公諒

敬亭山下讀書菴破紙窻寒儘自堪但怪蛟龍嘶匣底
不知風雨暗江南雲橫墨海秋帆斷花落彤樓曉夢酣
五色石崩天項漏須君子脫巨鼇鑽 時至正乙巳秋
八月十五日會蘭雪聘君子鐵崖先生小蓬臺見示此
卷遂為之賦金盡山人錢岳

幽人讀書味真樂
堅坐那知風雨惡
他年高步玉堂中
還憶破窗寒寂寞
三衢徐汝霖

王叔明畫卷有聽雨樓
與此卷絕類
但此圖更清潤
有趙吳興法
尤可寶也
跋者十餘人
皆名士
鐵崖語
甚奇
惜不傳于遺集
董其昌觀于金閭
官舫因題
丙寅仲春望

巖居高士圖

臨池學書王右軍
澄懷觀道宗少文
王侯筆力能扛鼎

五百年中無此君 題王叔明巖居高士圖倪瓚

琴聲相繼讀書聲坐覺乾坤氣獨清一曲高山流水遠
千編深雪小窗明音非妙指安能發學必通經可得成
富貴人生俱有道韓公何論短長檠 方外夷簡題
後有陳留張壁長干沙門子仁靈谷沙門清源天竺
沙門博洽諸詩失錄

黃鶴山樵鐵網珊瑚圖

鐵網網得珊瑚枝寄與東吳苑高士翠羽飛來毛羽寒

石化青羊叱不起金鼎夜煉天地根閑門不識桃花春
吳烟拂草瀛洲綠鳥啼花落空愁人百壺美酒恣傾倒
銷盡春愁人不老却從鶴背看塵寰四海如杯嵩華小

黃鶴山中樵者王叔明畫并題

天上仙人王子喬由來眼識天下士黃鶴山中卧白雲
使者三徵那肯起崑崙樹老盤玉根青鸞對舞瑤臺春
昨朝贈我神錦段謂我九老仙都人閨苑花前因醉倒
謫下人間容易老百花樓中作酒狂一聲鐵篴乾坤小

王崖生范立奉和

王公獨得天然趣，揮毫不效丹青士。
澹墨銀箋掃畫圖，琅玕屈鐵參差起。
碧苔暗水流石根，深山花落黃鸝春。
琴書几杖白晝靜，何因致我塵埃人。
高平之仙非潦倒，醉後狂歌不知老。
有約盧敖賦遠遊，九點齊烟望中小。
豫章胡儼次韻

升中文兄示及叔明王公所寄詩畫，令僕品題之。僕隨口和韻。升中歡賞既久，即命書以冠其顛云。珊瑚千年

生海底至寶終當遇奇士黃鶴仙人狡獪徒笑蹋靈鼇
輕掣起波濤洗盡泥沙根元氣尚帶龍宮春裹藏什襲
贈知己長生范老非常人明憲玩之驚絕倒世間一任
韶華老釣竿猶記拂長柯三點神山眼中小吳郡顧
祿奉題

王公外家襲金紫不比尋常韋布士一時結納多譽髦
早歲聲華倏然起閒移翠竹當雲根更有古樹枝含春
自云珊瑚出鐵網投贈豈與塵中人范君相見即傾倒

喜盍朋簪成二老玉壺滿泛紫流霞痛飲狂歌天地小
益齋王彥文奉和

黃鶴山人多意氣真是高亭老仙士揮毫髣髴如有神
怪石嶙峋筆端起琅玕玉樹生雲根畫圖奪得江南春
邇來遨遊東海上持贈玉崖之高人兩翁相逢遂傾倒
醉裏不知天地老持竿共結滄洲期一釣猶嫌六鼇小
奉和黃鶴山樵贈范玉崖詩韻東蒙李仁

黃鶴山中名畫史自昔才華冠多士淋漓醉墨寫幽篁

翠梢搖搖拂雲起古樹槎牙鐵石根虬枝糾結江南春
苔華空繞外家宅玉堂仙去今何人清尊却憶花前倒
憂樂只應懷范老畫圖難寄相思心滄溟浩渺珊瑚小

安湖老人王士顯

武韻

廷珪墨掃金花紙知是香光老居士鳳向高岡時一鳴
龍從碧海雙飛起紫苔碧蘚點雲根占盡湖山無限春
上題詩句添藻麗遠贈高平英偉人此圖當世俱壓倒
我亦倡酌繼諸老高堂落筆風雨驚不覺氣吞雲夢小

沈瑜奉和玉崖前韻

山骨嶙峋浸秋水虎視眈眈如胄士青鸞三五閭風來
下立瑤堦不飛起坡頭有樹蟠虬根上凌霄漢中含春
只疑老蛟出海底化作千歲之神人眼觀此圖欲絕倒
飛上香鑪尋五老一尊試酌湘江仙望望君山隔雲小
諸生張禮

僕既題詩于上興猶未已再賦一首贅于下方尚希
玉崖文兄清覽云 吳郡顧祿

鶴山老樵列仙徒玉崖先生名世士一時傾蓋兩相逢
作畫賦詩高興起欣然為寫竹數根傍有古樹回陽春
蛟龍盤拏鳳鸞舞清氣自然能逼人金壺墨汁都傾倒
壓盡蘇公井米老須臾更著石嶙峋海上移來蓬股小
黃鶴仙翁寄余詩畫兩學賢友俱有和章明窓展玩
珠明玉潤照耀後先其修篁古木清趣不減在于崑
閬間也喜不自己余初效顰之後復續此詩以謝諸
公之佳貺云爾

黃鶴仙翁有詩寄不比尋常書畫士天入丹山鸞鳳飛
雷驚陸地蛟龍起人生如寄萍無根相逢意氣皆如春
東吳文學最瀟灑二王尤是風流人長仙醉來玉山倒
散盡黃金數東老更期李白共殮霞誰信壺中天地小
錢唐范立

圖作兩枯樹古幹嶙峋儼然積翠池所植後見宋人
網魚圖愛其景色幽妍而售畫者欲余此幅遂舉以
相易未幾網魚圖又歸之盛彥修矣烟雲過眼可勝

三嘆 封禺外史玉記

王叔明雙松圖

一個釣船千頃月
兩株松樹滿山秋
如今老作江南客
水國漁鄉處處留
王蒙畫并題

碧眼支郎耳更聰
軒楹占斷白雲中
有聲聽到無聲處
錯認長松是老龍
丹丘柯九思

聽松圖

八十三翁馬士英書
叔明為古松禪師寫

年去年來年復年
長松亂立南軒前
綠陰遮却半天日

聲氣欲驚山虎眠老僧時倚闌干聽聽之有動還無靜
風擊風敲朝暮聲飄然不礙芙蓉鏡松梢掛月月放光
一白倒浸莓苔蒼濤聲響于彈八琅隔窻沟沟形體忘
我亦乾坤清氣者十年埋沒紅塵下踏遍東阡并南陌
幾欲投閒閒未得聽松軒人年已大兩耳松聲幾經夏
平生愛人青松軒耳聽不厭松聲繁他日東林結蓮社
再招陶令來祇園聽松禪客耳能聽着個幽軒萬木中
風捲翠濤聲急處海門飛出老虬龍 廣信吳元善

黃鶴樵叟竹石

凌雲高節鳳毛疎，錯落霜根老不枯。
仙子已乘黃鶴去，玉笙吹月向蓬壺。
題黃鶴樵叟竹石荏溪張輅

萊竹猗猗白石齒，齒齒紫萌紛填翠。
實甘美鳳兮鳳兮，當來鳴而棲止。
方泉金彥楨

風落湘江秋正波，重瞳消息竟如何。
竹間猶有斑斑淚，應是英皇恨更多。
五雲生

王叔明竹趣圖

款云王蒙為
怡雲上人寫

整龍翻空翠濤響玉虹吐雨秋波爽天風吹出讀書聲
時有幽人自來往 錢唐王羽

茅屋書聲雜澗聲一簾山色雨初晴蕭蕭翠竹無窮趣
更有琴樽趣又清 竹本無趣人自得竹之趣猶淵明
之得園趣耳畫者題者其亦得竹之趣乎文中藏之亦
同得此趣者矣丁丑歲十月望日浚儀張間識

我昔曾遊黃鶴山山人留我閉松關山中風雨經十日
萬壑千巖空翠間別來浪跡遊湖海歲月茫茫不相待

回首東南頻夢飛山空鶴去人何在畫裏依稀記往年
水光山色自依然尋遊尚有山中客揮手誰招鶴上仙
竹陰深鎖秋窻曙疑是山人吟嘯處人生行樂付東流
萬事浮雲總何許我欲山中訪舊遊酒船橫渡洞庭秋
長歌黃鶴歸來曲盡洗胸中今古愁 青城山人王汝
玉

磻底茆茨六月寒清風遶榻翠檀欒此君別有何情趣
卷幔令人不厭看 謝縉

雲嶂參天列翠屏石泉飛雪洒嵒扃竹聲琴趣清如許
塵世誰能洗耳聽義易偶桓

又竹趣圖

為王黃
合作

僕暇日為郡曹劉彥敬畫竹趣圖甫畢而一峯黃處士
見過僕出此求印正處士以為可添一遠山并樵徑天
趣迥殊頓增深峻矣時省郎耿君督兵華亭索僕畫甚
急思拙筆弱頃刻不能就用輟此奉獻吳興王蒙謹
題

叔明公子文敏公之外孫也天姿神品其于翰墨深入
晉漢至于鑒裁尤所精詣鷗波之宅相非子而誰耶
至正壬辰冬公望一峯道人年七十三

元人墨竹

秋夜涼如水蒼竿戛擊清噴泉珠錯落帶月弄寒聲
天台山人周景升題于竹西艸堂

元人墨菊

華上玄霜壓鬢寒葛巾漉酒不曾乾高風千載無遺影

誰寫墨花秋露團

栗里秋香

海漁子題

水國秋高八月涼誰將玉杵搗玄霜
西風吹入東籬下萬朵無尋一點香
錢唐凌雲翰

江國秋風第一枝清香不殿羲熙時
柴桑午夜藤蘿月景入疎窻色更奇
時甲午冬竹雅裴日英作于荆南客邸
栗里秋香一云錢選筆先荆公得之吳功甫玉記

元人情仙花輦圖

花是情仙仙是花七香百合萬吹霞雪麝神力無教失

漠漠冰天落內家

桃花夢叟題

仙輦非俗駕可彷彿乃以古樹根及虬枝盤結上覆
雜花為幙一白鹿馭之坐輦者明璫翠翹冠碧瑤蓮
辮綴楓葉垂霞帔朱舄側粉幫如削圭玉手握團扇
支頤娟娟若有所思即所謂情仙也前導兩侍兒執
綏按轡各錦纏頭揎臂絡金釧豹皮櫛葉圍纖腰一
紅屐蹻尖一黃鞞弓樣雙股現暫膩如毛衣狀偶語
若有所指應促情仙赴約乎假使鹿仙相值定受騎

頸矣故老鐵云雪麋神力無教失耳末句則廉夫當時極羨天魔舞女背行蓮掌疑仙姬墮此情種歟此幅為仇英所臨在余家余又有瑤島羣真圖亦元人卷後女真數隊一秉耜一挑大葫蘆作隊一荷簞一東芝艸一倚鹿一控鶴作隊一擁巨笠一種芝盆中作隊一跨鳳一乘青鸞在海天雲際作隊俱作毛女粧束焉客閱而咤之曰毛女一而已矣何若是其雜然耶余不答惟簡諸載記條列若干為毛女女譜分

其仙凡得六類璀璨燦燦怪怪奇奇亦無形之丹青也梯仙國平陽冲玄子識于玄風閣之氣韻生動間

元人着色春景山水

橋回綠水斜春樹隔烟霞隱處誰云識千峯只一家
雲隱

青山翠黛裊晴霞流水濺濺帶落花不覺雲間有雞犬
始知空外有人家 海漁

元人松齋沐髮圖

松翻翠影罨茆齋千里風雲入壯懷
沐髮據床忘對客
不知謝萬悵然回
張淵
國初人

列嶂飛泉過雨時
迴風碧浪影差差
扁舟底事不歸去
更向晴波照鬢絲
文嘉

元人題江叟吹笛圖


江楓葉赤蘆花白
烟水茫茫晚山碧
釣罷歸來酒一壺
醉倚蓬窻弄長笛
弄長笛無腔拍一任
江南與江北
八月蒼江蘆覆洲
南洲老人迴釣舟
壺漿飲空獨醉後

橫笛吹開天地秋
弄節調音轉淒激
蕭蕭兩鬢寒
衝額山雲漠漠幽
樹青江水粼粼
江月白是時萬籟俱無聲
寥寥玉宇聲縱橫
涼風浙瀝隨處發
玄鶴咬戛相和鳴
鳬雁飛來如近覩
鷓鴣徘徊鷺鷥舞
靈妃不入水仙宮
神龍盡出馮夷府
一龍吟浪羣龍鬪
鼓鬣揚髯擁先後
傳宮換羽自浮沉
過徵歸商迭清溜
一聲叫破蒼旻裏
鴻濛呼回九澗底
暘谷金烏忽驚起
搖落烟波千萬里

東海徐瑄

王弇州觚不觚錄畫當重宋而三十年來忽重元人
乃至倪元鎮以逮明沈周價驟增十倍瓷器當重哥
汝而十五年來忽重宣德以至永樂成化價亦驟增
十倍大抵吳人濫觴而徽人導之俱可怪也今吾吳
中陸子剛之治玉鮑天成之治犀朱碧山之治銀趙
良璧之治錫馬勲治扇周治治商嵌及歙呂愛山之
治玉王小溪治瑪瑙蔣抱雲治銅皆比常價再倍而
其人至有與縉紳坐者近聞此好流入宮掖其勢尚

未已也噫畫重元人自昔已然當沈啓南之前有金
文鼎集勝國十一名家觀其題跋可知矣惜元美先
生未見此冊耳有芒氏玉水磊砢者識



珊瑚網卷三十五